



Vol. 3 | No. 1 | 1959



সাহিত্য পত্রিকা

journal.bangla.du.ac.bd

শেখ ফজলুল করিম ও তাঁর রচনা

Volume	3
Issue	1
Year	1959
ISSN	0558-1583
eISSN	3006-886X
Author(s)	Anisuzzaman
Published online	June 15, 1959
DOI	10.62328/sp.v3i1.2
Link to article	https://doi.org/10.62328/sp.v3i1.2
Pages	25-60
Publisher	University of Dhaka
Copyright	সাহিত্য পত্রিকা
Designed and Developed by	Zobayer Abdullah

শেখ ফজলুল করিম ও তাঁর রচনা

আনিসুজ্জামান



মীর মশাররফ হোসেনের (১৮৪৭—১৯১২) পদাঙ্ক অনুসরণ করে যেসব বাঙালী মুসলমান আধুনিক বাংলা সাহিত্যক্ষেত্রে প্রবেশ করেছিলেন, তাঁদের মধ্যে গদ্যলেখক হিসেবে মোজাম্মেল হক (১৮৬০—১৯৩৩) ও লিরিক কবি হিসেবে কায়কোবাদ (আ° ১৮৫৮—১৯৫২) বিশিষ্ট শক্তির পরিচয় দিয়েছেন। কিছুকাল পর আমরা আর দু'জন সুপরিচিত লেখকের সাক্ষাৎ পাই : ইসমাইল হোসেন সিরাজী (১৮৮০—১৯৩১) ও শেখ ফজলুল করিম' (১৮৮২—১৯৩৬)। মোজাম্মেল হকের মতো এঁরাও গদ্য ও পদ্য দুইই রচনা করেছেন, কিন্তু তাঁর মতো এঁরাও প্রধানতঃ গদ্যলেখক। ইসমাইল হোসেন ও ফজলুল করিম উভয়েই আবাল্য সাহিত্যচর্চা করেছেন : একজন প্রথম কবিতা রচনা করেন স্কুলের চতুর্থ শ্রেণীর ছাত্র হিসেবে,^১ অন্যজন পঞ্চম শ্রেণীর ছাত্রাবস্থায় একটা গোটা কবিতার বইই প্রণয়ন করে ফেলেন^২। তবে — এজ্ঞে নয়, রচনাকুশলতার দিক দিয়ে — ফজলুল করিমের দাবী বোধহয় ইসমাইল হোসেনের ওপরে।

১। তাঁর প্রথম যুগের বইগুলোতে নামের বানান ছিল : শেখ ফজলুল করিম (তুষা, মানসিংহ), পরে তা হয় : শেখ ফজলুল করিম (ছার্মাতলু, পরিজ্ঞাপ ইত্যাদি)। একটি বইয়ের আখ্যাপত্রে পাই : শেখ ফজলুল করিম, যদিও ভূমিকার নীচে স্বাক্ষর আছে : শেখ ফজলুল করিম (আফগানিস্থানের ইতিহাস)। তাঁর কোন কোন বইয়ের সাম্প্রতিক সংস্করণে নাম আছে : শেখ ফজলুল করীম (বিবি রহিমা, তু-স; পৃথ ও পাথেয়, দ্বি-স)। অধিকাংশ বইয়ের বানান অনুযায়ী এখানেও শেখ ফজলুল করিম লিখিত হল।

২। এম. সিরাজুল হক : শিরাজী-চরিত (কলিকাতা : শিরাজী লাইব্রেরী, ১৯৩৫)।

৩। মুহম্মদ আবদুল হাই ও সৈয়দ আলী আহসান : বাংলা সাহিত্যের ইতিবৃত্ত (ঢাকা : ঢাকা বিশ্ববিদ্যালয়, ১৯৫৬), পৃ ১৯৪।

শেখ ফজলুল করিম সাহিত্যবিশারদ, নীতিভূষণ, কাব্যরত্নাকর (বিভিন্ন প্রতিষ্ঠান থেকে লব্ধ এসব উপাধি তিনি নিজের নামের সঙ্গে যুক্ত করেছিলেন) -এর ব্যক্তিগত জীবন সম্পর্কেও আমাদের ধারণা শোচনীয়ভাবে সীমাবদ্ধ। আমরা কেবল জানি যে, রংপুর জেলার কাকিনা গ্রামে আমিরউল্লাহ্ সরদারের ঔরসে ও কোকিলা বিবির গর্ভে তাঁর জন্ম হয়* —১৮৮২ খৃষ্টাব্দের ৯ই এপ্রিল তারিখে*। কাকিনায় পাঠদশায় তাঁর কবিত্বের বিকাশ হয়।* নানা পত্রপত্রিকায় তিনি রচনা প্রকাশ করতে থাকেন এবং গ্রন্থ প্রণয়ন করেন। ১৩১৫ সালে কাকিনা থেকে ‘বাসনা’ নামে একটি মাসিকপত্র তাঁর সম্পাদনায় প্রকাশিত হয়* এবং ছ বছর স্তূৰ্ণভাবে প্রচারিত হয়*। ‘জমজম’ ও ‘কল্লোলিনী’ নামে আরো দুটি পত্রিকাও তিনি প্রকাশ করেছিলেন বলে জানা যায়। আমি তাঁর আঠারোটি প্রকাশিত বইয়ের খোঁজ পেয়েছি। বাংলা সাহিত্যের ইতিবৃত্তে তাঁর মোট গ্রন্থসংখ্যা বলা হয়েছে ছাব্বিশ, অপ্রকাশিত গ্রন্থের সংখ্যা আঠারো।* ১৯৩৬ খৃষ্টাব্দের ২৮শে সেপ্টেম্বর তারিখে,* মতান্তরে ১৯৩৭ খৃষ্টাব্দে,*^{১১} তাঁর জীবনাবসান ঘটে।

শেখ ফজলুল করিম যেকালে সাহিত্যক্ষেত্রে প্রবেশ করেছিলেন, সেকালে বাঙালী মুসলমানের মধ্যে দুটি চিন্তা রীতিমতো স্থানলাভ করেছে : ধর্মসম্প্রদায়

৪। ঐ, পৃ ১৯৩।

৫। আশরাফ সিদ্দিকী : “মুনশী মেহেরুল্লাহ্ র মৃত্যুতে শেখ ফজলুল করিমের শোক গাঁথা”, মোহাম্মদী, শ্রাবণ ১৩৬২। এই তারিখ তিনি পেয়েছেন ফজলুল করিমের অপ্রকাশিত আত্মজীবনী পাণ্ডুলিপিতে। এই আত্মজীবনীটি এখনো প্রকাশিত হয়েছে কিনা জানিনা।

৬। হাই ও আহসান : পূর্বোক্ত, পৃ ১৯৪।

৭। যোগীন্দ্রনাথ সমাদ্দার ও রাখালরাজ রায় : সাহিত্য পত্রিকা (কলিকাতা, ১৩২২), পৃ ১৪৭।

৮। ঐ, পৃ ১০৬।

৯। হাই ও আহসান : পূর্বোক্ত, পৃ ১৯৪।

১০। আশরাফ সিদ্দিকী : পূর্বোক্ত। কবির আত্মীয়স্বজনের কাছ থেকে এই তারিখ তিনি পেয়েছেন।

১১। ‘বিবি রহিমা’র তৃতীয় সংস্করণের (১৯৩৯) বিজ্ঞাপনে প্রকাশকের নিবেদন।

হিসেবে তার স্বাভাবিক আবেগ আর বর্তমান ছরবস্থা সম্পর্কে সসঙ্কোচ সচেতনতা। সেইসঙ্গে ভবিষ্যতে উন্নতিলাভ সম্পর্কে একটা অস্পষ্ট আশাবাদী চেতনাও গড়ে উঠছিল। ফজলুল করিমের ব্যক্তিগত পরিবেশের দিকে তাকালে আমরা গভীর সুফী প্রভাব লক্ষ্য করি। বংশানুক্রমে তাঁরা ছিলেন চিশতিয়া সম্প্রদায়ভুক্ত পীরদের মুরীদ। সুফী ভাবধারাপুষ্ট পীরবাদ তাঁর আন্তরিক সমর্থনও লাভ করেছিল। ‘পথ ও পাথের’ অবতরণিকায় তিনি তাই বলেছেন :

ক্ষুধা যেমন অকাটা সত্য হইয়া ত্বনিরীক্ষ, বিধাতাও তেমনি সত্য অন্তরঙ্গ হইয়াও ছদর্শ। তাঁহাকে অনুভব করিবার, হৃদয়ে ধরিবার জন্ত জীবন ধারাটিকে বিরূপে সজ্জিত করিতে হইবে, মানুষ মাত্রেরই তাহা শিক্ষা করা উচিত।

এই শিক্ষা গ্রহণের জন্ত উপযুক্ত শিক্ষকের আশ্রয় লইতে হয়।.....এ পথের “গাইড”—গুরু ব্যতীত পথ চলা সাধারণতঃ অসম্ভব।

সুফীমতের একটি মূলকথা এখানে তিনি বলেছেন। এর মধ্যে আমরা যেন দার্শনিক ইমাম গাজ্জালীর (মৃত্যু ১১১১ খৃষ্টাব্দ) উক্তির প্রতিধ্বনি শুনতে পাই :

...the disciple [*murid*] must of necessity have recourse to a director [*shaikh*, or in persian *pir*] to guide him aright. For the way of the faith is obscure, but the devil's ways are many and patent, and he who has no shaikh to guide him will be led by the devil into his ways. Wherefore the disciple must cling to his shaikh as a blind man on the edge of a river clings to his leader, confiding himself to him entirely, opposing him in no matter whatsoever, and binding himself to follow him absolutely. Let him know that the advantage he gains from the error of his shaikh if he should err, is greater than the advantage he gains from his own rightness, if he should be right.^{১২}

বংশগতভাবে সংক্রামিত এই সুফী ভাবধারা তাঁর সাহিত্যসাধনাকে বিশেষভাবে প্রভাবান্বিত করেছে।

১২। quoted in H. A. R. Gibb : Mohammedanism (2nd ed., London: Oxford University Press, 1950), pp 150-51.

এর উপরে, মুনশী মেহেরুল্লাহ্ (১৮৬১-১৯০৭) প্রভাবও তাঁর জীবনে কার্যকরী ছিল। মেহেরুল্লাহ্, অবশ্য শরীয়তপন্থী ছিলেন এবং শরীয়তপন্থীদের সঙ্গে সুফীবাদীদের মত ও পথের ব্যবধান যত বড়ই হোক না কেন, মেহেরুল্লাহ্‌র একনিষ্ঠ ইসলাম প্রচার তাঁকে মুগ্ধ করেছিল। আর ফজলুল করিমের মধ্যে মেহেরুল্লাহ্‌ দেখেছিলেন এক সম্ভাবনাময় সাহিত্যিক প্রতিভা। বাঙালী মুসলমানের মধ্যে সাহিত্যিক প্রতিভা খুব সূক্ষ্ম ছিল না বলে তাঁকে উৎসাহিত করা তিনি কর্তব্য মনে করেছিলেন। ফজলুল করিমের সর্বপ্রধান কাব্যগ্রন্থ ‘পরিত্রাণ’ যখন চরম রক্ষণশীল মুসলমানদের নিন্দার বিষয় হয়েছিল, তখন মেহেরুল্লাহ্‌র আগ্রহাতিশয্যেই সেটি পুস্তকাকারে প্রকাশিত হয়।

অতএব, ইসলামের প্রতি গভীর নিষ্ঠাই যে ফজলুল করিমের জীবনে প্রধান উপাদান হিসেবে দেখা দেবে, তা স্বাভাবিক। তবে সে ইসলাম যে বিশেষভাবে পারস্যের তত্ত্বচিন্তার লক্ষণাক্রান্ত, এতেও কোন সন্দেহ নেই।

দুই

উনবিংশ শতাব্দীর শেষভাগেই শেখ ফজলুল করিম সাহিত্যচর্চায় প্রবৃত্ত হয়েছিলেন। তাঁর প্রথম বই ‘সরল পদ্য বিকাশ’ রচনাকালে তিনি ছিলেন পঞ্চম শ্রেণীর ছাত্র।^{১০} পঞ্চম শ্রেণীর ছাত্রের হাতে বিকশিত পদ্য যত সরলই হোক না কেন, সাহিত্য-আলোচনায় তাকে টেনে না আনাই ভাল। বইটি ছাপা হয়ে বেরিয়েছিল কিনা, জানি না। কারণ, ১৩০৭ সালে প্রকাশিত ‘তৃষ্ণা’ কাব্যকে তাঁর প্রথম গ্রন্থ বলা হয়েছে ঐ কাব্যের ভূমিকায়। প্রকাশক জানাচ্ছেন :

তরুণ কবির কএকটি ক্ষুদ্র ভক্তি সঙ্গীত প্রকাশিত হইল, তাঁহার দীর্ঘ সাহিত্য দেবার ফল—কবিতাওচ্ছ—সময়ান্তরে “শেফালিকা” নামে প্রকাশিত হইবে, আপাততঃ সংবাদপত্রিকায় মুদ্রিত হইতেছে, আশা করি তদ্বারা বঙ্গসাহিত্যের অল্পাধিক উপকার হইতে পারে।...বর্তমান পুস্তক তাঁহার প্রথম সাহিত্যক্ষেত্রে প্রবেশের প্রয়াস মাত্র।...

ক্রাউন ১/৮ মাপের চব্বিশ পৃষ্ঠার এই চটি বইটিতে (দাম তিন আনা) সতেরোটি গীতিকবিতা সংকলিত হয়েছে, তার মধ্যে একটি সাধক মনসুরের কবিতার অনুবাদ। সুফী কবিতার মতো এই রচনাগুলোয়ও শ্রষ্টাকে প্রেমিকারূপে কল্পনা করা হয়েছে। ভূমিকায় ‘ভক্তিসঙ্গীত’ কথাটির উল্লেখ না থাকলে অবশ্য রূপকের প্রতি কারো দৃষ্টি আকৃষ্ট হত না এবং এগুলোকে আবেগ-প্রবণ প্রেমের কবিতা বলে মনে করতে কোন বাধা হত না। উদাহরণস্বরূপ ‘কেন যাও?’ কবিতাটি থেকে উদ্ধৃত করা যাক :

দূরে কেন যাও সরি

আমি যে পরাণে মরি

তা তুমি কি এতদিনে জানিয়াও জান না,

এ হৃদয় কার তরে ?

যা দিয়েছি তা তোমারে

অনর্থক হৃদিবনে দাবানল জ্বল না।

[পৃ ৭]

‘সমাধি-সঙ্গীত’ কবিতাটি তরুণবয়সের ভাবালুতার পরিচায়ক। আঠারো বৎসর বয়স্ক লেখকের ‘দীর্ঘ সাহিত্যচর্চা’র একটি মাত্র সুফল আমরা ‘তৃষ্ণা’ কাব্যে দেখতে পাই : তাঁর প্রকাশভঙ্গীর সারল্য ও বাচনভঙ্গীর প্রত্যক্ষতা। তবে সমসাময়িক সমালোচনায় কথিত ‘প্রতি ছত্রে নবীন কবির প্রতিভা বিচ্ছুরিত হইতেছে’^{১৪}—মন্তব্যটি অতিশয়োক্তি ছাড়া আর কিছু নয়।

ভূমিকায় উল্লিখিত ‘শেফালিকা’ কাব্যগ্রন্থ বোধহয় অনেক তরুণ লেখকের বিজ্ঞাপিত ‘যন্ত্রস্থ’ গ্রন্থের মতোই কখনো যত্নের মুখ দেখে নি। সুতরাং, এতে বাংলা সাহিত্যের অগ্নাধিক উন্নতি কি হতে পারত, সে সম্পর্কে নিঃসংশয়ে কিছু বলা চলে না।

‘তৃষ্ণা’ উৎসর্গ করা হয়েছিল ডাক্তার ময়েজউদ্দীন আহমদ ওরফে মধু মিয়াকে, যার সম্পাদিত ‘প্রচারক’ (১৮৯৯-১৯০২) নামক মাসিকপত্রে তাঁর সাহিত্যকর্ম নিয়মিত প্রকাশ পেত। অনতিবিলম্বে মোহাম্মদ রেযাজউদ্দীন

আহমদ-সম্পাদিত মাসিক ‘ইসলাম প্রচারক’ (নবপর্ষায় ১৮৯৯-১৯০৬)^{১৫} এবং এস. কে. এম. মহম্মদ রওসন আলী চৌধুরী-সম্পাদিত ‘কোহিনূর’ (১৮৯৮-১৯১৫) মাসিকপত্রেরও তাঁর রচনা দেখা দিল। আরো পরে, সৈয়দ এমদাদ আলী-সম্পাদিত ‘নবনূর’ পত্রিকার (১৯০৩-১৯০৬) তিনি নিয়মিত লেখক হয়ে উঠলেন। মোজাম্মেল হক-সম্পাদিত ‘মোসলেম ভারত’ পত্রিকায়ও (১৯২০-২১) তিনি নিয়মিত লিখতেন।

‘প্রচারকে’ প্রকাশিত একটি প্রবন্ধ ছোট আকারের বোল পৃষ্ঠার পুস্তিকা হয়ে (দাম ছ পয়সা) বের হল ১৯০৩ খৃষ্টাব্দে, নাম ‘মানসিংহ’। ‘বাংলা সাহিত্যের ইতিবৃত্তে’ এটিকে “গল্পনাটক” বলা হল কেন, আমি তা বুঝতে পারি নি, যেমন বুঝি নি লেখকের পক্ষে বইটি লেখার আবশ্যিকতা কি ছিল। ‘বঙ্গভাষায় মানসিংহের জীবনচরিত নাই’, এই অভাববোধ থেকে তিনি ‘কয়েকখানি প্রাচীন ও প্রামাণ্য ইতিহাস অবলম্বনে এই অতি ক্ষুদ্র গ্রন্থখানি সংগ্রহ’ অর্থাৎ সংকলন করেন। এটি তাঁর প্রথম গল্পগ্রন্থ, যাকে তিনি বলেছেন ‘ঐতিহাসিক চিত্র’। সাধুভাষায় লেখা বই, মধ্যে মধ্যে ধ্বনিময় শব্দবহুল বাক্যরচনার চেষ্টা আছে :

ভারতের রাজনৈতিক গগনে অলঙ্কিতে আকবরের দৃষ্টি ভ্রমাবৃত অগ্নির মত স্মৃতিষ্ক আগ্রহে নিক্ষেপিত হইতেছে, সে জ্বালাময় অগ্নি সমুদয় শক্তিকেই গ্রাস করিতেছে, স্মৃতরাং নিশ্চুপ থাকি অর্কাচীনের কার্য্য : অধিকন্তু এই দুর্ভেদ্য কৌশলজাল ছিন্ন করিয়া অতি অল্প ব্যক্তিই মুক্তবন্ধন হইতে পারিবেন। সমুদয় পথ সংকীর্ণ ও কণ্টকাকীর্ণ হইয়াছে, স্মৃতরাং আকবর ভিন্ন সূচাকুরূপে রাজ্যরক্ষার উপায় নাই। ইতিপূর্বে অনেক রাজপুত কুল-ভাস্কর এ পথ পরিকারও করিয়াছিলেন,—স্মৃতরাং মানসিংহ সত্রাটের এই অমিতভেজ অলৌকিক বলের নিকট মস্তক অবনত করিলেন। [পৃ ৩]

রচনা হিসেবে ‘মানসিংহ’ সর্বাঙ্গসুন্দর নয় : এই উদ্ধৃতির মধ্যেই ‘মত’ ‘নিশ্চুপ’ ও ‘পরিকারও’ শব্দের অসঙ্গত প্রয়োগ দৃষ্টি এড়ায় না। জীবনী হিসেবেও এটি অসম্পূর্ণ। ‘নবনূর’ যথার্থই বলেছেন :

এই ক্ষুদ্র পুস্তিকায় লেখক প্রসিদ্ধ মানসিংহের জীবনী সংগ্রহের চেষ্টা করিয়াছেন; কিন্তু উপযুক্ত উপকরণাভাবে তিনি সে চেষ্টা সম্পূর্ণ ফলবতী করিতে পারেন নাই। তাঁহার ভাষাও অনেক স্থানে জটিল ও ইতিহাসের অন্তর্গত বোধ হইল।...^{১৬}

‘মানসিংহ’র পরই তাঁর আরেকটি পুস্তিকা বের হইল, নাম ‘আস্বাত-উস-ছামী বা ছামাতব্ব’। সাতাশ পৃষ্ঠার চটি বই, প্রকাশকাল ‘সন ১৩১০ সাল, কার্তিক’। এই শাস্ত্রীয় বিতর্কের বইটিকে আখ্যাপত্রে অবশ্য অনূদিত গ্রন্থ বলা হয়েছে। ‘চিশ্-তীয়াহ্ ও সুহ্-রাওদীয়াহ্ সম্প্রদায়ভুক্ত সাধকদের মধ্যে অবিকল কীর্তনের অনুরূপ প্রেম-প্রকাশের ধারা প্রচলিত ছিল—তাঁহার নাম “সমা” বা “গানের বৈঠক”। কোন বিশেষ বিশেষ দিবসে এই সম্প্রদায়ভুক্ত সাধকগণ একস্থানে একত্রিত হইতেন, এবং গান-বাজনার সাহায্যে অন্তরকে উদ্দীপ্ত করিয়া ভগবৎ প্রেমে গড়াগড়ি দিতেন বা নাচিতে থাকিতেন।’^{১৭} চিশতিয়াহ্ ও সুহ্-রাওদীয়াহ্ সম্প্রদায়ের সাধকদের যিকিরের জন্য ‘সামা’র ব্যবহার অপরিহার্য ছিল, তবে অগ্রাণ্ড সম্প্রদায়ের সুফীরাও এর চর্চা করতেন। ধর্মানুশীলনের মধ্যে নৃত্যগীতের সংযোজন ধর্মসিদ্ধি কি না, এ নিয়ে মুসলমান শাস্ত্রকারদের মধ্যে মানারকম তর্কবিতর্ক হয়ে গেছে। আল-গাজ্জালী এর অনুমোদন করেছিলেন। ‘সামা’র চর্চা করতেন বলে পরবর্তীকালে অনেক সুফী সম্প্রদায়ই নৃত্যরত দরবেশ নামে পরিচিত হতেন।^{১৮} কাকিনা-নিবাসী মৌলভী আবদুল লতিফ নতুন করে আবার এই পুরোনো প্রশ্ন উত্থাপন করেন যে, ‘(ক) সঙ্গীত ও (খ) বাজ—যাহা চিশতিয়া খান্দানের পূর্বাপর চলিয়া আসিতেছে, এবং বর্তমানে ভক্ত মুসলমান সম্প্রদায়ের মধ্যে প্রচলিত আছে—ইহা সরাহ অনুসারে সিদ্ধ কি অসিদ্ধ?’ তাঁর বিশ্বাস ছিল যে, এই প্রথা শাস্ত্রানুমোদিত নয়।

১৬। নবনূর, ফাল্গুন ১৩১০, পৃ ৪৪২।

১৭। মুহম্মদ এনামুল হক : বদে সুফী-প্রভাব (কলিকাতা : মোহসীন এণ্ড কোং, ১৯৩৫), পৃ ১৬৯-৭০।

১৮। Tarachand : Influence of Islam on Indian Culture (Allahabad : The Indian Press Ltd., 1946) pp 82-83.

এই যুক্তি খণ্ডন করে একটি প্রতিবাদপত্র রচনা করেন মজল্‌ফুরনগর নিবাসী “জনাব, হজরত, মওলানা, হাজি, হাফেজ, কারী, মহম্মদ শাহাবুদ্দিন সাবেরি”। ফজলুল করিমের ‘ছানাতুল’ তারই অনুবাদ বা সেই ভিত্তিতে বাংলায় লেখা প্রবন্ধ।

সতেরো বৎসর বয়সে ফজলুল করিম গড়ে ‘লায়লী মজলু’র প্রেমোপাখ্যান রচনা করেছিলেন, পরে হজরত মুহম্মদের (দঃ) জীবনী অবলম্বনে লিখেছিলেন ‘পরিত্রাণ’ কাব্য। ১৯০১ সালে ‘প্রচারক’ পত্রিকায় এ দুটি রচনাই একসঙ্গে প্রকাশিত হতে থাকে। তিনি যদিও তখন ‘ইসলাম প্রচারক’র নিয়মিত লেখক, তবু তার সম্পাদকের রক্ষণশীল চিন্তা এতে ক্ষুণ্ণ না হয়ে পারে নি। অধিকন্তু, বোধ করি, ‘প্রচারক’র সঙ্গে বাবসারিক প্রতিযোগিতার ব্যাপারটিও ইন্ধন জুগিয়ে থাকবে। ‘সমাজ-সেবক উচিত বক্তা’ নামে তিনি (অন্য কেউও হতে পারেন) অত্যন্ত ক্ষোভের সঙ্গে লিখলেন :

“প্রচারক” নামক একখানি মাসিকপত্র আছে।... বোধহয় কোন অর্ধাচীন প্রতারক লোক সমাজসেবার ভাণ করিয়া প্রতারণার জাল বিস্তার করতঃ দু’পয়সা উপার্জন করিবার উপায় করিয়া লইয়াছে।... এক শেখ ফজলুল করিম ও সম্পাদক ভিন্ন অন্য সমস্ত লেখকই ইসলামবিরোধী কোরাণ অবিশ্বাসী হিন্দু।... শেখ ফজলুল করিম সাহেবেদেরও যে দুইটী প্রবন্ধ “প্রচারক” প্রকাশিত হইতেছে, তাহার একটী লায়লী মজলুর প্রেমোপাখ্যান, ‘অপরটী কবির কল্পনাপ্রসূত “পরিত্রাণ কাব্য”। ঐ লায়লী মজলুর প্রেমোপাখ্যান পাঠ করিয়া বর্তমান মুসলমান সমাজ কি শিক্ষা পাইবে?... লায়লীর রূপমাধুরী, অঙ্গসৌষ্ঠব, নয়নভঙ্গী, বিলোম কটাক্ষ, প্রেমকথন ও প্রেমচাতুর্য, মজলুর প্রেমাসক্তি ও প্রেমোন্মত্ততা দ্বারা আমাদের পতিত সমাজের কি উপকার হইবে?... অধুনা আমাদের যে দুই চারিজন নব্য যুবক শিক্ষাক্ষেত্রে প্রবেশ করিতেছেন, ঐরূপ প্রবন্ধ প্রকাশদ্বারা তাহাদের মাথা খাওয়ার যোগাড় হইতেছে না কি? তারপর পরিত্রাণ কাব্য। ইহার নাম যেমন কাব্য, প্রকৃতপক্ষে কাব্যই। এ সম্বন্ধে অধিক কিছু বলিতে চাহি না; কেবল মাত্র জিজ্ঞাসা করি যে বিষয় অবলম্বনে উহা লিখিত হইতেছে, তদ্বিষয়ে অসার কল্পনাপ্রসূত কাব্যাকারে প্রবন্ধ লেখার অধিকার কোন মুসলমানের আছে কি?...”^{১৯}

সমালোচকের এই অভিশাপের ফলে কি না, জানি না, ‘প্রচারকে’ ‘লায়লী মজনু’ ও ‘পরিত্রাণ’ সম্পূর্ণ হতে পারল না—রচনা সবটা ছাপা হবার আগেই পত্রিকার আয় শেষ হল।

ফজলুল করিম এতে অবশ্য বিচলিত হলেন না। বরঞ্চ মুনশী মেহেরুল্লাহ্ স্বতোপ্রবৃত্ত হয়ে ১৯০৩ খৃষ্টাব্দে ‘পরিত্রাণ’ কাব্য প্রকাশ করায় তাঁর উৎসাহ বৃদ্ধি পেল। এটি উৎসর্গ করা হল ‘চিশতিয়া খান্দানের উজ্জ্বলতম নক্ষত্র’ মোহাম্মদ শাহ্, শাহাবউদ্দীন চিশতি সাবেরি সাহেবকে। ইনিই তাঁদের পরিবারের পীর, লেখকের চোখে ‘দেব’তুল্য। তাই তাঁর নিবেদন,

বড় আশা পাব দেব অস্ত্রিমে তোমার
চরণ মঞ্জীর।

‘গ্রন্থের দুই একটা স্থানে আমি মাইকেল ও নবীনবাবুর ভাবে অনুপ্রাণিত হইয়াছি, এ জন্য তাঁহাদের নিকট চিরঋণী হইয়া থাকিব’—অবতরণিকায় কবি একথা বলেছেন। এই ঋণ অমিত্রাক্ষর ছন্দগ্রহণে, কতিপয় শব্দপ্রয়োগে, (যেমন, ‘আকাশ-সমুদ্র-বাণী’ ‘বিহঙ্গকুল’ ‘নীরবিলা’ ‘কল্পনে লো!’ প্রভৃতি) এবং ‘কি পাপে দারুণ বিধি তোমার কপালে লিখেছিল হেন দুঃখ’ প্রভৃতি বাক্য বা বাক্যাংশের ব্যবহারে। মাঝে মাঝে অবশ্য তিনি অন্য ছন্দও ব্যবহার করেছেন।

এই কাব্যের বিষয়বস্তু ইসলামপ্রচারের প্রথম পর্যায়ে কোরেশদের বিরোধিতা, নবীর মদিনায় হিজরত, বদর, ওহোদ ও খায়বরের যুদ্ধ এবং মক্কাবিজয়—হিজরত মুহাম্মদের (দঃ) জীবনের এই ঘটনাবলী। এটা যাতে কাব্য হয়ে ওঠে, সেজন্য কবির চেষ্টা ছিল। তাই মধ্যে মধ্যে দীর্ঘ নিসর্গবন্দনা আছে, যার অংশ :

নিদাখ-শর্করী-অন্ত, দ্বিধ্ব সমীরণ
চুম্বিয়া লতিকা-বক্ষ বহে ধীরি ধীরি
শান্তোজ্জ্বল পূর্ণিমার ভাতিলা পূর্বে
নাশিতে বিশ্বের তমঃ— হাদিসা প্রকৃতি
আনন্দে দোলায় শিব ; নিকুঞ্জ বল্লরী
সে উৎসবে মাতিলেক যেন এ ধরায়
সুখের স্বপন পেয়ে।

অন্যান্য লেখকের মতো তিনিও মুসলমানদের বর্তমান দুর্দশার জন্য কাতরতা প্রকাশ করেছেন :

কাঁদার সময় অজি হয়েছে মোদের
মোস্লেম সন্তান মোরা হেন দীন হীন
ধর্মহারা পথভ্রান্ত অলস অধম
কেবল গণিছি বসি মরণের দিন !
জগতে পতিত বলি ইসলামের নামে
কলঙ্ক দিয়েছি ঢালি অভাগ্য অংগরা ।

[পৃ ৮৪]

মাতৃভাষার অনাদরের জন্যে কবির আক্ষেপোক্তি :

কি পাপে দারুণ বিধি তোমার কপালে
লিখেছিল হেন দুঃখ বল বঙ্গভাষা,
অনাহারে, অবহেলে,— পরিচর্যাভাবে
জীর্ণশীর্ণ হারায়েছ সকল ভরসা ।...
হতভাগ্য বাঙ্গালীর অদৃষ্টের দোষে
তুমি মা কাঙ্গালী আজ আপনার দেশে ।

[পৃ ৮৩]

‘পরিভ্রাণ’ সম্পর্কে ‘নবনুরে’র সমালোচনাকে যথার্থ বলা যায় :

সমালোচ্য কাব্যখানি বাহ্যদৃষ্টিতে সুন্দর হইলেও কবি মোজাম্মেল হকের গ্রন্থাপেক্ষা সর্বোংশে নিকৃষ্ট ।... কেবল ব্যবহার-বিবল আভিধানিক শব্দ-সমষ্টি জুড়িয়া দিলেই যদি কাব্য হইত, তবে এই কাব্যখানিও উৎকৃষ্ট কাব্য মধ্যে পরিগণিত হইত, সন্দেহ নাই ।... লেখক একমাত্র সংঘমের অভাবেই স্বীয় স্বাভাবিক শক্তির অপব্যয় করিয়াছেন, ইহা নিতান্তই দুঃখের বিষয় ।... বস্তুতঃ শেখ ফজলুল করিম সাহেবের একটু শক্তিমত্তায় আমরা আশাবিত্ত হৃদয়ে এতদিন তদীয় গতি পর্য্যবেক্ষণ করিতেছিলাম । তিনি আমাদেরকে সে আশায় জলাঞ্জলি দিতে বাধ্য করিতেছেন কেন ?^{২০}

মোজাম্মেল হকের কাব্য^{২১} যেখানে শেষ হয়েছে, ফজলুল করিমের কাব্যের শুরু সেখানে। ‘হজরত মুহম্মদ’ কাব্যের প্রথম সর্গে ‘মক্কানগরী ও জমজম কূপের কথা’ বিবৃত হয়েছে, শেষ (সপ্তবিংশ) সর্গে ‘হজরত আবুবকরের ইসলাম গ্রহণ’-এর কাহিনী। ছন্দের বৈচিত্র্য ও ভাষার পরিচ্ছন্নতায় তাঁর কাব্যটি গুণাবিত। তবে, এই তুলনার সময়ে একথা মনে রাখা উচিত যে, মোজাম্মেল হকের এটি পরিণত রচনা, আর ফজলুল করিমের সাহিত্যসাধনার তখন প্রথম অধ্যায়। তাছাড়া, বিগত শতকের আদর্শ কাব্যকাহিনী রচনার ধারা তখন পর্যন্ত অনুমত হয়ে থাকলেও তা প্রাণহীন গতানুগতিকতায় পরিণত হয়েছিল মাত্র।

সতেরো বৎসর বয়সে যে তিনি ‘লায়লী-মজনু’ লিখেছিলেন, এতে খুব বিস্মিত হবার কারণ নেই,—শরৎচন্দ্রের দৃষ্টান্ত তো আমাদের সামনেই আছে। রচনাটি পুস্তকাকারে বের হল ১৯০৩ খৃষ্টাব্দে। ‘সূচনা’য় প্রেম সম্পর্কে যেসব তত্ত্বকথা তিনি বলেছেন, তাতে বঙ্কিমচন্দ্রের ভাবধারার না হোক, রবীন্দ্রনাথের সমসাময়িক কবিতার প্রভাব আছে :

...প্রেমের দুই মূর্তি—সকাম এবং নিকাম। সকাম প্রেম, রূপজ, মোহজ বা স্বার্থজ। ইহাতে লাভ অপেক্ষা ক্ষতি অধিক; স্মৃতরাং উপেক্ষনীয়। আর নিকাম প্রেম, খাঁটি জিনিষ। জীবজগৎ এই প্রকার প্রেমে পরস্পর পরস্পরকে আকর্ষণ করুক, ইহাই বিধাতার অভিপ্রেত। [পৃ ১/০]

সুফী ভাবধারার পরিচয়ও সুস্পষ্ট :

এখানে আমরা নিকাম প্রেমকে সদগুরুর আসন দিতেছি; কারণ প্রেমের উন্মেষ ভিন্ন মুক্তির পথ অন্ধকার ও বন্ধুর। সেইখান হইতেই মহাপ্রেমের সূচনা ও সন্মিলন বাসনা উদ্ভিক্ত হয়। যখন প্রেম-রূপ সদগুরু হৃদয়ে বসিয়া, সর্বসত্তার মধ্য দিয়া ধর্মের মহোচ্চ পথ দেখাইয়া দেয়, তখনই বিপুল সত্যের জ্যোতিঃ আসিয়া কাম-রূপ পাপের কালিমাকে আবৃত করিয়া ফেলে। এইখানেই মানবজীবনের দেবত্ব,—এইখানেই অমরত্ব। [পৃ ১/০]

২১। মোজাম্মেল হক : হজরত মোহাম্মদ (কলিকাতা, ১৩১০; পঞ্চম সংস্করণ, মোস্টেম পাবলিশিং হাউস, ১৩৪২)।

লায়লী-মজনুনের জীবনে এই দেবসুলভ প্রণয়ের আবির্ভাবকেই তিনি তাঁর রচনায় গৌরবমণ্ডিত করেছেন। এই প্রেমের গভীরতা এবং ভাবতন্ময়তায় নায়ক-নায়িকার বাহ্যজ্ঞানলুপ্তি তিনি বেশ আবেগসহকারে চিত্রিত করেছেন। কিন্তু সেইসঙ্গে তাঁর সামাজিক মনের ভালমন্দ বোধও সক্রিয় ছিল। বইটিতে স্বকপোলকল্পিত একটি চরিত্র আমদানীর কৈফিয়ত দিতে গিয়ে তিনি বলেছেন :

চতুর্থ পরিচ্ছেদে আমরা এক নূতন সখীর সরস ছবি আঁকিতে চেষ্টা করিয়াছি। আর কোনও ভাষায় “লায়লী-মজনু”তে ইনি বোধহয় এখনও দেখা দেন নাই। মায়ের মুখোমুখী লায়লী প্রেম-ঘটিত গজনার প্রতাপ্তর প্রদান করিতেছেন, প্রাচীন লেখকের পক্ষে এ ছবি সঙ্গত বোধ হইলেও, একালে নিতান্ত নিল্লজ্জতার পরিচায়ক। তাই আমরা ধরিয়া বাঁধিয়া এক সখী জুটাইয়াছি। [পৃ. ১০০/০]

প্রকৃতপক্ষে এর কোন আবগ্যকতা ছিলনা। কেননা, বইতে নায়িকা প্রাচীন মাপকাঠিতে এতরকম- “নিল্লজ্জতা”র পরিচয় দিয়েছেন যে, সনাজ-ও সুনীতি-রক্ষক পাঠকের পক্ষে, মায়ের সঙ্গে তাঁর কথা কাটাকাটিতে আর নতুন করে মর্মাহত হবার সুযোগ নেই।

লায়লী মজনুনের প্রেম যে প্রাকৃত প্রেম নয়, এ কথা বোঝাবার জন্যে লেখক চেষ্টার ক্রটি করেন নি। লায়লীকে পাবার জন্য সাধনা করতে গিয়ে মজনু অপর্যাপ্ত শক্তি লাভ করেছেন এবং শুধু তাই নয়, শেষ অবধি তাঁর প্রণয় ধাবিত হয়েছে লায়লীকে অতিক্রম করে তাঁর স্রষ্টার প্রতি। তাই লায়লীকে একান্ত কাছে পেয়েও মজনু তাঁকে পিত্রালয়ে ফিরিয়ে নিয়ে গেলেন এবং নিজে সমাহিত হলেন পরমপুরুষের ধ্যানে। তাঁর স্ত্রীধর্মী চিন্তার প্রকাশ এখানেও আমরা দেখতে পাই। গ্রন্থের শেষভাগে লায়লীর প্রতি রাজা নওফেলের আকর্ষণকে কেন্দ্র করে নাটকীয় জটিলতা গড়ে উঠতে পারত, সহজ বর্ণনা দিয়ে লেখক সে সুযোগ নষ্ট করেছেন। একটি কৌতুককর বিষয় হল, হজরত মুহম্মদের (দঃ) নামে লায়লীর শপথবানী উচ্চারণ। লেখক তার কৈফিয়ত দিয়েছেন এ ভাবে :

এই ঘটনা শেষ প্রেরিত মহাপুরুষের বহু পূর্বের হইলেও, তাঁহার আগমন সংবাদ আদিকাল হইতে ধর্মগ্রন্থাদিতে লিপিবদ্ধ ছিল। বিদূষী লায়লীর ইহা জানিবার বাকী ছিল না। [পৃ ৮৩ পা.টী.]

এ যুক্তি এতই অকিঞ্চিৎকর যে মন্তব্যের অপেক্ষা রাখে না।

এই বইটিতে তাঁর রচনা প্রথম [দানা বাঁধল। এটি সাধুভাষায় লেখা, প্রায়ই চোখে পড়ে তৎসম শব্দের আধিক্য ও সমাসের আড়ম্বর :

বসন্তকাল— প্রেম সোহাগ-উদ্বেলিত দিগদনা নব-সাজে দিভূষিতা। আকাশের চাঁদ, কাননের ফুল, ভ্রমরের প্রেমালাপ, পাপিয়ার অতৃপ্ত সঙ্গীত, বিরহীর নয়নাশ্রু এখন সমস্তই অনিন্দ্যসুন্দর।... রতিপতি কমল-আসনে ফুলশর হস্তে যুগ্ম-নেত্র উন্মীলনপূর্ব্বক কাহারও কোমল প্রাণে শর-সঙ্কান করিতেছেন,—সে দৃষ্টি কি ভীষণ! [পৃ ৮]

অসম্বৃত্তা লায়লী আলুলায়িতকুন্তলা তাবুল-রাগ-রঞ্জিতা ওষ্ঠাধরা, অন্ধোন্মুক্ত-বক্ষোবাসা, কোটীন্দুকলা-কেন্দ্রিকৃত্য, প্রেমিকা-কুল-কিরীটিনী লায়লী সহসা শিহরিয়া উঠিলেন। [পৃ ৩৬]

সেইসঙ্গে অসুচিত প্রয়োগ ও গুরুচণ্ডালী দোষও দেখা যায় :

সত্যের জয় অবিসম্বাদী! নতুবা এ পবিত্র প্রেমের প্রীতিদ-তরঙ্গ যুগ্মযুগান্তর ভেদ করিয়া আজ বিশ্বের বিদগ্ধ বক্ষ অভিযুক্ত করিত না। বালুকায় জল ঢালার মত অকালে শুকাইয়া যাইত। [পৃ ২৭]

আমরা গ্রন্থকার। নায়ক-নায়িকার মুখে না কহিবার কথাটাও একবার বাহির করিয়া লই। তা' না'হলে আসর জমে না, পাঠক মজেনা; কিন্তু আমাদের একটা সার্বভৌম আশা আছে। [পৃ ৪৯]

ভাবা ও ভাবচর্চিত আনোচিতের সর্বাপেক্ষা গুরুতর নিদর্শন :

বিনা তারে টেলিগ্রাম হয়, প্রাণে প্রাণে কথা হয়, ইহার আবার প্রমাণ কি দিব? হৃদয়ের মত টেলিগ্রামের যন্ত্র আজিও জগতে আবিষ্কৃত হইয়াছে কি? আর চোখের মত অপূর্ব্ব “ক্যামেরা” আজিও কেহ দেখিয়াছেন কি? এ ফটো তুলিবার প্লেট—প্রাণ। [পৃ: ১৫]

শেখ ফজলুল করিমের রচনাভঙ্গীর একটি বড় ক্রটি এই ধরনের বালকোচিত উক্তি, যা তাঁর পরিণত বয়সের রচনাকেও আক্রান্ত করেছিল। এখানে আরেকটি উদাহরণ দিই। লায়লীর বিবাহ হয়েছে, সেই রাত্রে :

উদ্ভাস্ত রাজপুত্র আর আশ্বস্বরণ করিতে পারিলেন না,—আবেগভরে প্রিয়তমাকে বন্ধে জড়াইবার জন্য হস্ত সম্প্রসারণ করিলেন ; কিন্তু এ কি ? চপেটাঘাত তো প্রেমোপহার নহে ! যে প্রেমরাণীর বিমল সুধার আশায় রাজপুত্রের দক্ষ হৃদয় এতদিন ছিলকণ্ঠ কপোতের মত যন্ত্রণায় অধীর হইয়াছিল, আজ তাহার এ কি ব্যবহার ! [পৃঃ ৮১]

উপমা-উৎপ্রেক্ষা ব্যবহারেও ভাষারীতির মতোই তিনি উনিশ শতকী পদ্ধতির অনুসরণ করেছেন :

মেঘাচ্ছন্ন রজনীতে সৌদামিনী বিকাশের মত একটু হাসিলেন । [পৃ ৩৩]

ঈঙ্গিতার মধুর চন্দ্রানন দেখিয়া কএস ত্বষিত চাতকের মত জাগ্রত স্বপ্নে ব্যাকুল হইয়া গৃহপানে চলিলেন । [পৃ ২২]

অনন্ত সাগরবক্ষে বাত্যাহত উর্গিমালার স্নায় লায়লী তখন হৃদয়বেগে পরিচালিতা । [পৃ ৩৯]

যেন পবিত্রতা আসিয়া প্রেমের মন্দিরে প্রবেশ করিল । যেন রাজহংসী আসিয়া কমলবনে প্রবেশ করিল । যেন পুণ্য আসিয়া ধর্মের মন্দিরে প্রবেশ করিল । [পৃ ৩২]

সমাসোক্তির ব্যবহার আছে, তেমনি ছেলেমানুষী করে এমন ব্যবহার নষ্ট করেছেন, তার উদাহরণও রয়েছে :

তখন গোধূলী সিন্দূর পরিয়া মেঘবালা যেন স্বপ্নরালয়ের দিক অগ্রসর হইতেছিল । [পৃ ১৮]

প্রতিবস্তুপনার (Parallel simile) প্রয়োগ এবং আশ্বগত উক্তি [পৃ ২৬, ৪৩, ৬৭] বা পাঠক ও পাত্রপাত্রীর উদ্দেশ্যে উক্তিও [যেমন, পৃ ৭১] এতে আছে । সংলাপের ভাষা সাধারণতঃ কথ্য : কখনো কখনো সাধুভাষার সংলাপ আছে এবং কখনো কখনো সাধু ও কথ্য ক্রিয়াপদের ব্যবহার আছে একই সঙ্গে ।

লায়লী মজনু'র পর শেখ ফজলুল করিম লিখলেন চিশ্‌তিয়া সাধকদের আদিগুরু 'মহর্ষি হজরত খাজা মইনুদ্দীন চিশতী (রহঃ) জীবন চরিত' (১৯০৪)। এ জীবনকাহিনী যে অলৌকিক ঘটনায় আকীর্ণ হবে, তার আভাস পাওয়া যায় ভূমিকা থেকেই :

বর্তমান সময়ে এক শ্রেণীর লোক অলৌকিক ক্রিয়াকলাপ বিশ্বাস করিতে চাহেন না ; কিন্তু নিবিষ্ট মনে ভাবিয়া দেখিলে বুঝা যাইবে, যাঁহাদিগের হৃদয় সর্বশক্তিমান খোদাতার অসীম শক্তির প্রভাবে ক্ষমতাশালী, তাঁহাদিগের পক্ষে সাধারণ মানুষের অসাধ্য কোন আশ্চর্য ঘটনাপ্রদর্শন, বিশ্বয়ের বা অবিশ্বাসের কথা নহে।

এই 'আশ্চর্য ঘটনাপ্রদর্শনে'র মধ্যে আছে একটি শিশুসহ খাজা সাহেবের অগ্নিকুণ্ডে প্রবেশ ও অকৃত অবস্থায় নিজগমণ, তাঁর ইচ্ছায় ছিন্নমুণ্ড ব্যক্তির জীবনলাভ, হজরতের সমাধি থেকে তাঁর প্রতি আহ্বান, তাঁর ইচ্ছায় প্রস্তরমূর্তি কর্তৃক আল্লাহ'র জয়গান, তাঁর আদেশে মাতৃগর্ভস্থ শিশুর বাক্যলাপ, প্রতি রজনীতে খাজা সাহেবের মক্কাগমন ও প্রাতে আজমীরে প্রত্যাবর্তন। এইসঙ্গে 'সামা'র পক্ষসমর্থন আছে, আর আছে চিশ্‌তিয়া সম্প্রদায়ের গুরুত্বজ্ঞাপনের একটি 'শস্তা পন্থা'। খাজা সাহেব যখন কাবা প্রদক্ষিণ করেন, তখন তাঁর প্রার্থনার উত্তরে নাকি আকাশবাণী হয় যে, 'যে ব্যক্তি চিশ্‌তিয়া খান্দানে মুরিদ হইবে, সে নির্বিচারে বেহেশতে গমন করিবে' [পৃ ৩৫]।

মোজাম্মেল হকও মঈনউদ্দীন চিশ্‌তীর জীবনী রচনা করেন—তবে অনেক পরে।^{২২} তাঁর গ্রন্থেও অতিপ্রাকৃত ঘটনার অভাব নেই। ফজলুল করিম পীর সাহেবের অলৌকিক শক্তির পরিচয় দিয়েছেন, মোজাম্মেল হক তাঁর পাছকার অলৌকিকতা দেখিয়ে তবে দ্বন্দ্ব হয়েছেন। কিন্তু সুফী মতবাদের ইতিহাস ও প্রকৃতি এঁরা কেউই ব্যাখ্যা করেন নি, অথবা, প্রধান প্রধান

২২। মোজাম্মেল হক : খাজা মঈনউদ্দীন চিশ্‌তি (ঢাকা : আবদুল আজিজ খাঁ, ১৩২৫)।

সুফী সম্প্রদায়ের মধ্যে যে একমাত্র শাখা (চিশতিয়া) ভারতের মাটিতে বিকাশলাভ করে, তার তাৎপর্য বিশ্লেষণ বা সম্পূর্ণ পরিচয়দান করতে এঁরা কেউই প্রবৃত্ত হন নি।

‘মহর্ষি হজরত এমাম রব্বানী মোজাদ্দাদে আলফ-সানী’ (১৯০৫) পুস্তকাকারে প্রকাশিত হবার আগে পত্রিকায় ধারাবাহিকভাবে বেরিয়েছিল।^{২৩} আলফ-ই-সানীকে তিনি ‘নখ্শবন্দিয়া ও মোজাদ্দাদিয়া তরিকার প্রদীপ্ত রবিকর’ বলে অভিহিত করেছেন। মুজাদ্দাদ-ই-আলফ-ই-সানী শেখ আহমদ সরহিন্দী (১৫৬৩-১৬২৪) যদিও নখ্শবন্দীয়া সম্প্রদায়ভুক্ত সাধক, তবু ভারতে সুফী মতবাদের প্রধান সংস্কারক এবং সমগ্র মুসলমান সমাজের একজন শ্রেষ্ঠ চিন্তানায়ক হিসেবে ইতিহাসে স্থানলাভ করেছেন। সুফীদের তসউফের সঙ্গে ভারতীয় ব্রহ্মবাদের মিলন এবং সামগ্রিকভাবে সুফী চিন্তাধারার সঙ্গে ভারতীয় দর্শনের ভাবমিশ্রণের ফলে যে সব ইসলাম-বিরোধী মনোভাব ভারতীয় সুফী সমাজে প্রবেশলাভ করেছিল, সরহিন্দী তারই বিরুদ্ধে আন্দোলন করেছিলেন।^{২৪} এঁর জীবনী রচনায় প্রবৃত্ত হয়ে ফজলুল করিম একথা জানাতে ভোলেন নি যে, মুজাদ্দাদ তাঁর জনক হজরত শেখ আবদুল আহাদ চিশতী কুদসীর কাছে চিশতীয়া ও কাদিরীয়া পন্থায় দীক্ষালাভ করেছিলেন, নখ্শবন্দীয়া ধারায় দীক্ষিত হন পরবর্তীকালে— হজরত বাকীবিল্লাহ্‌র প্রভাবে। এই মহাপণ্ডিতের জীবনকাহিনী বিবৃত করতে যেয়েও তিনি অলৌকিকতার মোহ ত্যাগ করতে পারেন নি। সম্রাট জাহাঙ্গীরকে প্রণতি জানাতে অস্বীকার করায় মুজাদ্দাদ কারারুদ্ধ হয়েছিলেন।

প্রবাদ আছে, এই সময়ে হজরতের সিদ্ধ শিষ্য দেবকগণ আধ্যাত্ম শক্তিবলে মোগল সাম্রাজ্য ধ্বংসের আয়োজন করিয়াছিলেন, কিন্তু হজরত জানিতে পারিয়া, স্বপ্নে তাঁহাদিগের প্রতি নিষেধাজ্ঞা জ্ঞাপন করিয়া বলেন, “ঐর্ধ্য ধারণ কর; ইনশা আল্লাহ্‌ আমি শীঘ্রই এখান হইতে মুক্তিলাভ করিব”।^{২৫}

২৩। ইসলাম প্রচারক, আগস্ট ও ডিসেম্বর ১৯০৪, জাম্মুয়ারী ১৯০৫।

২৪। মুহম্মদ এনাযুল হক : পূর্বোক্ত, পৃ ৩৪০।

২৫। ইসলাম প্রচারক, জাম্মুয়ারী ১৯০৫, পৃ ৫৯-৬০।

অতঃপর সম্রাট-দুহিতা স্বপ্নে হজরত মুহম্মদের (দঃ) আদেশলাভ করলেন আহমদ সরহিন্দীকে মুক্তিদানের জন্যে। অনুতপ্ত জাহাঙ্গীর তাঁর কাছে ক্ষমাপ্রার্থনা করে মুক্তি দিলেন আর স্বয়ং তাঁর শিষ্যমণ্ডলীর অন্তর্ভুক্ত হলেন।

‘আফগানিস্থানের ইতিহাস’ (১৯০৯) রচনার আশু উপলক্ষ্য ছিল আমীর হাবীবউল্লাহ্ খানের ভারত সফর। বইটি তেমন সুখপাঠ্য নয়, তবে হিন্দু-মুসলমানের মিলনসাধনে লেখকের আগ্রহের পরিচয় আছে নিম্নোদ্ধৃত অংশে :

যেদিন দিল্লীতে ঈদের সময় হিন্দু-মুসলমান উভয় জাতিকে সমুপস্থিত করিবার জন্য দোষা কোরবানীর অনুষ্ঠান করিয়া তিনি [আমীর হাবীবউল্লাহ্ খান] অনন্তশুলভ সাম্যবাদের পরিচয় দিয়াছিলেন, সেদিন কোন রাজনীতিবিদ ব্যক্তি তাঁহার প্রজাপালন নীতির সুস্পষ্ট আভাষ বুঝিতে না পারিয়াছিল। [১০]

প্রসঙ্গক্রমে উল্লেখ করা যেতে পারে যে, যে মনোভাবকে ফজলুল করিম এখানে অভিনন্দন জানিয়েছেন, কুড়ি বছর আগে মীর মশাররফ হোসেন সেই একই মনোভাব থেকে তাঁর ‘গো-জীবন’^{২৬} পুস্তিকা প্রণয়ন করেছিলেন। এতে কিন্তু গোঁড়া মুসলমানেরা ক্ষুব্ধ হয়েছিলেন। শুধু তাই নয়, পুস্তিকা-রচয়িতাকে ‘কাফের’ আখ্যা দিতে এবং তাঁর স্ত্রী হারাম হবার ফতোয়া দিতেও কুষ্ঠিত হন নি। এমন কি, পণ্ডিত রেয়াজ-অল-দীন আহমদ মশহাদীর মতো লেখকও ছদ্মনামে ‘অগ্নিকুণ্ড’^{২৭} রচনা করে তার প্রতিবাদ জানিয়েছিলেন। এই সমুদয় বাদ-প্রতিবাদের নিষ্পত্তি হতে মশাররফ হোসেন এবং তাঁর বিরুদ্ধপক্ষীয়দেরকে আদালতে পর্যন্ত যেতে হয়েছিল। শেখ ফজলুল করিমকে এ বিপদে পড়তে হয় নি। তিনি একজন মুসলমান রাষ্ট্রপ্রধানের কাজ সমর্থন করেছিলেন বলে কেবল নয়, যুগের ভাবলোকেই কিছুটা পরিবর্তন এসে গিয়েছিল।

বাঙালী মুসলমানের যে পতন হয়েছে, এটা সে যুগে স্বতঃসিদ্ধ ছিল। এই পতনের একটি কারণও তখন সাধারণভাবে গ্রাহ্য হয়েছিল। কারণটি হচ্ছে,

২৬। মীর মোশাররফ হোসেন : গো-জীবন (টান্গাইল : চন্দ্রকুমার সরকার, ১২৯৫)।

২৭। ফকির আবদুল্লা-বিন-এসমাইল অল্ কোরেশী অল্ হিন্দী : অগ্নিকুণ্ড (কলিকাতা : ভারত মিহির প্রেস, ১২৯৬ ; দ্বি-স শাহানশা এণ্ড কোং, ১৩০৯)।

বাঙালী মুসলমানের আদর্শচ্যুতি। অতএব, তার জীবনে যাতে এই আদর্শের পুনঃপ্রতিষ্ঠা ঘটে, সে বিষয়ে অনেকেই সচেতন হয়ে পড়লেন এবং এই চেষ্টাটা প্রধানতঃ দেখা দিল আদর্শ পুরুষদের জীবনকাহিনী রচনার মধ্য দিয়ে। ‘পথ ও পাথেয়’তে (১৯১৩) শেখ ফজলুল করিম এই আদর্শ জীবনযাত্রার পরিচয় দিয়েছেন। ভূমিকায় তিনি বলেছেন :

সংসারের শত সহস্র আকর্ষণের মধ্যে, সুখদুঃখের খাত-প্রতিঘাতে, যাহাতে আমাদের চিন্তাচঞ্চল্য না ঘটে, সকল সময়, সকল অবস্থায় এক করুণাময়ের প্রতি নির্ভর রাখিয়া বাঞ্ছিত “সৌভাগ্যের” অধিকারী হইতে পারি, সেই আশায়, প্রত্যেক মানুষকেই মহর্ষিগণের ব্যবহৃত “পাথেয়” গ্রহণে শান্তির পথে,—
খোদার পথে অগ্রসর হওয়া কর্তব্য। অথ পথে শান্তি নাই।

এরপর তিনি বিভিন্ন মহাপুরুষের জীবনে নীতি ও ধর্মনিষ্ঠার নানা দৃষ্টান্ত আমাদের সামনে উপস্থিত করেছেন। ইমাম আহমদ হমবলের পুত্র উৎকোচের অর্থে ময়দা কিনে পিতাকে উপহার দিয়েছিলেন : সেই ময়দায় তৈরী রুটী গ্রহণ করতে ইমাম সাহেব তো অস্বীকার করলেনই, উপরন্তু যখন সেই রুটী নদীগর্ভে নিক্ষেপ করা হল, তখন তিনি সিদ্ধান্ত করলেন যে, সারা জীবন আর মাছ খাবেন না। প্রতিবেশীর বাড়ীতে চুরি হবার ভয়ে জনৈক মহর্ষি নিজের বাড়ীতে চুরি হতে সাহায্য করলেন। কোন ব্যক্তির সঙ্গে দেখা করতে এসে নির্দিষ্ট স্থানে হজরত ইসমাইল দু দশ মিনিট নয়, একাদিক্রমে বাইশ দিন অপেক্ষা করে অঙ্গীকার পালন করলেন। নীতির দিক দিয়ে এগুলো হয়তো খুবই প্রশংসার, এঁদের অসাধারণ চরিত্রবলের প্রকাশ এতে নিশ্চয়ই ঘটেছে, কিন্তু সাধারণ মানুষের জীবনে এইসব দৃষ্টান্ত অল্পমত হবে, এমন আশা ছরাশা মাত্র। বরঞ্চ, দু একটি দৃষ্টান্তে, যেখানে প্রতিবেশীর অভাব দূরীকরণের চেষ্টায় হজরতের পুণ্য ঘটল কিংবা রসুলের বাণীতে যেখানে পরাক্রান্ত নূপতির অত্যাশ্রয় বিরুদ্ধে বিদ্রোহী দণ্ডপ্রাপ্ত হলে তাকে শহীদের চেয়েও শ্রেষ্ঠ মর্যাদা-দানের প্রতিশ্রুতি আছে, সেই সব অংশ বোধহয় আমাদের কাছে অধিকতর আবেদন জানায়। অবশ্য লৌকিক জগতের যেসব সুখদুঃখে চিন্তাচঞ্চল্য ঘটা লেখকের অকাম্য, সেই সুখদুঃখকে স্বীকার না করলে সম্ভবতঃ এই অভাব পূরণের বা এই বিদ্রোহের মাহাত্ম্য স্বীকার করা যায় না।

মোজাম্মেল হকের ‘তাপস কাহিনী’র^{২৮} সঙ্গে ফজলুল করিমের ‘পথ ও পাথেয়’র একটি পার্থক্য বোধহয় এখানে। মোজাম্মেল হকের গ্রন্থ পূর্ববর্তী : তপস্বীদের এইসব গুণে তিনি মুগ্ধ হয়েছেন, তাঁদের প্রতি লেখকের চিন্তা অন্ধাবনত হয়েছে, কিন্তু জীবনসাধনার ঋজু পন্থা ত্যাগ করে এইসব দৃষ্টান্ত অনুসরণ করতে তিনি বলেন নি। এক বিচিত্র অভিজ্ঞতার বিবরণ হিসেবে ‘তাপস কাহিনী’ উপাদেয় বই : পতিত জনকে অজ্ঞানের অন্ধকার থেকে সত্যজীবনের আলোকে আনয়নের ক্ষেত্রে পথপ্রদর্শক হবার কোন দাবী তার নেই।

লিখনরীতির দিক দিয়ে ‘পথ ও পাথেয়’র বৈশিষ্ট্য রচনার সংযমে এবং ভাষার আবেগহীন প্রকাশে। এর ভাষা যুক্তিবাহী গতধর্মী, বর্ণিত উপাখ্যান-গুলোকে পল্লবিত করবার কোন প্রয়াস এতে নেই।

‘চিন্তার চাষ’ (১৯১৬) একশত ক্ষুদ্র ক্ষুদ্র নীতি উপদেশমূলক রচনার সমষ্টি।

‘বিবি রহিমা’কে (১৯১৮) লেখক বলেছেন ‘ঐতিহাসিক চিত্র’। এটি ঠিক জীবনকাহিনী নয়, হজরত আইউব ও বিবি রহিমার দাম্পত্য জীবন এতে বর্ণিত হয়েছে। তথ্যনিষ্ঠার সঙ্গে সঙ্গে তিনি “বিষয়টিকে স্মৃতিপাঠ্য এবং সময়োপযোগী করিবার জন্য একটু উপন্যাসের রসে রসাইয়া” দিতে চেয়েছেন। চরিত্র, ঘটনা ও সংলাপ এতে আছে : উপন্যাসের সঙ্গে একা এটুকুই।

পাত্রপাত্রীর বংশপরিচয়দানের আবশ্যকতা বোধ করে লেখক শুরু করেছেন হজরত আদম থেকে এবং তাঁর বেহেশত বাসের সময় থেকে। বইয়ের প্রায় এক-চতুর্থাংশ জুড়েই এই পরিচয় চলেছে। পিতামাতার শিক্ষায় বিবি রহিমা শৈশব থেকেই আদর্শ চরিত্র হয়ে গড়ে উঠেছিলেন। মানবীয় দুর্বলতা হজরত আইউবের চরিত্রেও একবার দেখা দিয়েছে, শয়তানের চক্রান্তে পড়ে তিনি অন্তায় প্রতিজ্ঞা করেছেন। কিন্তু বিবি রহিমা আপাদমস্তক আদর্শ রমণী। সংসারের প্রলোভন, শয়তানের চক্রান্ত, সপত্নীদের হিংসা, প্রতিবেশীদের আচরণ,

২৮। প্রথম প্রকাশ ‘তাপস জীবনী’ নামে (কলিকাতা : সত্যিক প্রেস, ১৩০৭)।

আল্লাহ্‌র পরীক্ষা, স্বামীর জ্বর, দারিদ্র্যের জ্বালা—কিছুই তাঁকে আদর্শচ্যুত করতে পারে নি। আল্লাহ্‌র প্রতি বিশ্বাস এবং স্বামীর প্রতি ভক্তি তাঁর অটুট রয়ে গেছে। সেই সঙ্গে তাঁর অপূর্ব বিনয় অবিচলিত আছে :

আইউব বলেন,—“রহিমা! পরশ পাথরের স্পর্শ পেলে নীরস লৌহখণ্ডও সুবর্ণে পরিণত হয়; তোমার মত সাধ্বী রমণীর স্বামী হয়ে আইউবের জীবনও ধন্য হয়েছে; পরশ পাথরের মত তুমি তার অন্তরের মলিনতা ঘুচিয়ে তাকে উজ্জ্বল করে তুলেছে। তুমি মহিমময়ী;—তোমার পবিত্র আদর্শ জগতের ঘরে ঘরে অনুকৃত হবে।”

করুণাময়ী রহিমা কুণ্ঠিত হয়ে বলেন,—“নাথ! রাক্ষসীকে দেবী বলছ? পিশাচীকে ছর বলছ? আমার পাপেই তো তোমার এই কষ্ট। আমি যদি তোমার উপযুক্ত সহধর্মিনী হতে পারতাম, তাহলে কি তোমাকে এত দুঃখ পেতে হয়!—এ সবই আমার কপাল।”

আইউব ব্যাকুলভাবে বলেন,—“না, রহিমা। এ তোমার ভুল বিশ্বাস। তুমি স্বর্গের ছর,—আমার জন্ত তুমি অশেষ যাতনা ভোগ করেছ;—আমাকে ক্ষমা করো। তোমার প্রশ্ন মুখ দেখতে পেলে আইউব শান্তিতে মরতে পার্কে।”

[পৃ ১৩৬]

আসলে দোষ অবশ্য রহিমার নয়, আইউবেরও নয়। শয়তানের চ্যালেঞ্জ গ্রহণ করে আল্লাহ্‌ এদের ভক্তিপরীক্ষার জন্তে নানারকম দুর্দশার সৃষ্টি করেছেন।

‘বিষবৃক্ষ’ (১৮৭২) রচনা করে বঙ্কিমচন্দ্র যেমন গৃহে গৃহে অমৃত ফলার আশা প্রকাশ করেছিলেন, ‘বিবি রহিমা’র লেখকও তেমনি গৃহে গৃহে আদর্শ স্ত্রী ফলার আশা প্রকাশ করেছেন। বইয়ের মুখবন্ধে তাই এর moralটিকে তিনি ছন্দোবদ্ধভাবে প্রকাশ করেছেন :

শয়নে স্বপনে সতি ! পতি-পদে রাখ মতি ;
পতিসেবা, পতিভক্তি নারীধর্মসার ।
পতির চরণতলে স্বরগ তোমার ॥

স্বামীসেবায় রহিমার চরমোৎকর্ষলাভের পরিচয় দিতে গিয়ে লেখক প্রায়ই তাঁর চারপাশে দৃষ্টিনিষ্ক্ষেপ করেছেন। ফলে, আমাদের সামাজিক অবস্থা সম্পর্কে তাঁর কিছু কিছু reflection এতে—এবং কেবল এই বইটিতেই—ধরা

পড়েছে। স্ত্রীশিক্ষার প্রয়োজনীয়তা [পৃ ৪৯-৫০], বাল্যবিবাহের কুফল [পৃ ৫২-৫৩], বিবাহে পণপ্রথা [পৃ ৫৭-৫৮], সপত্নীদের আচরণ [পৃ ৬৯-৭০] সম্পর্কে তাঁর মন্তব্য থেকে মোটামুটি একটা পরিচ্ছন্ন ভাবনার পরিচয় পাওয়া যায়। একালের মেয়েদের শ্রমবিমুক্ততা সম্পর্কে তাঁর মন্তব্য কৌতুকজনক :

বড় লোকের বড় আদরের—বড় সোহাগের মেয়ে রহিমা; কিন্তু তা বলে তোমরা মনে ক’রো না যে রহিমা ফুলের ঘায়ে মূর্ছা যান, — ইজি চেয়ারে সিগারেট মুখে কেবল নভেল পড়েন! হিষ্টিরিয়াগ্রস্ত বড়লোকের মেয়েরা সাধারণতঃ গরীব-হুঃখীকে অহঙ্কারে কথা বলেন না,—দেমাকে তাঁদের মাটিতে পা পড়ে না,—লোকের মধ্যে মেলামেশা করতেও যেন তাঁদের মান যায়,—কথায় কথায় রাগ, কথায় কথায় অভিমান করেন,—যাকে-তাকে কটুকথা বলেন, পশুপক্ষীকে যতনা দিয়ে আমোদ উপভোগ করেন; কিন্তু রহিমা ছিলেন ঠিক এর বিপরীত। [পৃ ৪৬-৪৭]

‘বিবি রহিমা’কে লেখক ‘নারী-সাহিত্য’ বলে অভিহিত করেছেন। শিশু সাহিত্যিকমাত্রই যেমন শিশু নন, তেমনি নারী-সাহিত্যিক পুরুষও হতে পারেন : সে বিষয়ে আমরা সঙ্গতভাবে কোন আপত্তি উত্থাপন করতে পারি নে। “স্ত্রীলোক-দিগের নিমিত্ত প্রকাশিত” ‘মাসিক পত্রিকা’র ভাষাকে প্যারীচাঁদ যেমন সহজবোধ্য করে তুলতে চেয়েছিলেন, ফজলল করিম তেমনি সবকিছু বড় সহজ করে বোঝাতে গেছেন। ফল কিন্তু এক হয় নি। প্যারীচাঁদ যেখানে বাংলা গদ্যরীতিতে পরিবর্তন এনেছিলেন, সেখানে ফজলল করিমের রচনায় মাঝে মাঝে বালস্বলভ চপলতা দেখা দিয়েছে। যেমন :

সে [নমস্কারের চাকর] রাগের মাথায় একবার হাতুড়িটা তুলে এমন জোরে কষে দিল “ঠকস” যে, সেই আঘাতে বাদশার মাথার খুলিটা একেবারে পাকা বেলের মত পট্টাস। [পৃ ২১-২২]

কিংবা,

সেকালের ধর্মহীন লোকদিগকে সুপথ দেখানোর জন্য খোদাতা’লা তাঁকে [আইউবকে] পয়গম্বররূপে প্রেরণ করেছিলেন। এই “প্রেরণ” অর্থে তোমার এ মনে ক’রো না যে, খোদাতা’লা তাঁকে আকাশ থেকে ধপ্ করে ফেলে দিয়েছিলেন। [পৃ: ৬০]

কিন্তু এর চেয়েও দুঃখজনক বোধ এই অংশটি :

হজরত আইউবের চৌদ্দ ছেলে-মেয়ে। তারা সব ভাই বোন এক জায়গায় বসে হাসি-খুশী করে আহার করছিল। কেউ খাচ্ছে, কেউ গল্প কচ্ছে, কেউ মুখের কাছে আহার তুলেছে, এমন সময় পাপের সহচরেরা এসে একটা প্রকাণ্ড পাঁচীর ভেঙ্গে তাদের উপর ফেলে দিল—তারা সব টুপ্‌টুপ্‌ করে মরে গেল। [পৃ ৯৯—১০০]

যেখানে একটি ট্রাজিক পরিবেশ সৃষ্টি করা চলত, সেখানে এই ‘টুপ্‌টুপ্‌ করে মরে’ যাওয়ার বর্ণনায় লেখকের নির্দিষ্টতাকে প্রশংসা করা যায় না, তাঁর সুযোগগ্রহণে অক্ষমতার কথা ভেবে বিস্মিত হতে হয়।

সেকালের সমালোচনায় ‘বিবি রহিমা’র প্রশংসা করা হয়েছিল এর নীতিবোধের জন্তে আর ভাষার প্রাঞ্জলতার জন্তে। দুইই সত্য। ইবসেনের নোরাকে তার স্বামী যে কথা বলেছিলেন Before all else you are wife and mother, সেখানে mother-এর বদলে আল্লাহর ভক্ত জুড়ে দিলেই এই নীতির স্বরূপ বোঝানো যায়। আর ব্যবহারিক জীবনে এই নীতির প্রয়োগ কিভাবে করা যেতে পারে, রহিমার জীবন কাহিনী দিয়ে এবং নানা রকম নীতি উপদেশ দান করে লেখক তা স্পষ্ট করে তুলেছেন। আদর্শবাদের চাপে তাঁর অঙ্কিত চরিত্রসমূহ ব্যক্তিত্ব হারিয়ে হয়েছে বর্ণহীন, তাদের মানবীয় আবেদন ক্ষুণ্ণ হয়েছে, নীতিকথা বলার আগ্রহাতিশয্যে তেমনি অনেক সময়ে তাদের স্বাভাবিকতা নষ্ট হয়েছে। রহিমার পতিগৃহে যাত্রার সময়ে তাঁর পিতার চার পৃষ্ঠাব্যাপী অনর্গল উপদেশ এখানে স্মরণ করা যেতে পারে। চার পৃষ্ঠার অন্তে তাঁর কণ্ঠ যদি বাষ্পরুদ্ধ না হত, তবে অনায়াসে তা আরো চার পৃষ্ঠা চলতে পারত।

অন্যদিক দিয়ে ‘বিবি রহিমা’র প্রশংসা করতে দ্বিধা হতে পারে না। কাহিনী পাঠক-চিত্তকে আকর্ষণ করে শেষ পর্যন্ত নিয়ে যায়। প্রাঞ্জল ও লালিত্যময় কথা ভাষায় বইটি লেখা হয়েছে : রচনার একটা সাবলীল গতি আছে। রচনারীতির লক্ষণীয় বৈশিষ্ট্যের মধ্যে আছে Parallel simileর ব্যবহার :

সোনার সহিত মোহাগার মত, ফুলের সহিত সুবাসের মত, রূপের সহিত গুণের মত, আইউবের চরিত্রে ধর্মের বিমল মাধুর্যও ফুটে উঠেছিল। [পৃ ৬৩]

সমাসোক্তির ব্যবহার (রূপক-সহযোগে) :

জ্যোৎস্নার সাগরে সাঁতার দিয়ে সিন্তকেশা ধরনী সবেমাত্র চুল শুকাবার জন্য মুক্ত
বাতাসে ধোঁপা খুলে দাঁড়িয়েছে। [পৃ ৮৩]

যমকের প্রয়োগ :

তাই খুশি আহ্লাদ করেই আমরা ফল খেলেম। ফলের শেষে ফলটা যে কি রকম
দাঁড়াবে, তা তখন ভেবে দেখলেম না। [পৃ ৬]

‘বিবি ফাতেমা’ও (১৯২১) কথারীতিতে লেখা। ভাষা সহজ, সরল, অনাস্থর,
আবেগপ্রবণ এবং সাংগীতিক ব্যঞ্জনাময়। যেমন,

হজরত এলেন, নির্গুণ চাঁদের মত স্নিগ্ধ আলোক ছড়িয়ে। পাপী-তাপীর বন্ধু
এলেন—ভেসে যাওয়া লোকগুলির প্রাণ বাঁচাবার জন্তু প্রেমের তরলী বেয়ে। মর্মে
মর্মে ব্যঙ্গারিত ক’রে—কর্মের আলোকে সকল পথ হুগম ক’রে দিয়ে—সামা
মৈত্রীর পতাকা ছুলিয়ে—তপ্ত মরুতে শীতল জলধারার মতই তিনি এসে উপস্থিত
হ’লেন। মানুষের কল্যাণের জন্তু এলেন, অন্ততপ্তের চোখের জল মুছাতে তিনি
এলেন। বন্দীর প্রাণ আনন্দে নেচে উঠল, হতাশের প্রাণ আশায় বাঁচল, রুগ্নদেহে
শক্তি সঞ্চারিত হ’ল, নীরস কঠোর চিত্তশিলা, গলে জল হয়ে গেল। যেহেতু তিনি
বন্দীর মুক্তিদাতা, হতাশের আশা, নষ্ট স্বাস্থ্যের নূতন রক্তকণিকা, বঠিন শিলার
উগ্র দ্রাবক। তাঁকে পেয়ে সকলের আশা মিটল, তাঁকে দেখে সকলের বিষাদ
ঘুটল, বন্ধুরূপে, ভ্রাতারূপে বৈদ্যরূপে, শাস্ত্রনারূপে তিনি এলেন। [পৃ ২২—২৩]

বইটির প্রতি অধ্যায়ের প্রথমে চার চরণের স্বরচিত কবিতা যোজিত হয়েছে। গ্রন্থ
শুরু হয়েছে হজরত মুহম্মদ (দঃ) ও বিবি খাদিজার বংশপরিচয় দিয়ে। এখানেও
লেখক মাঝে মাঝে উপন্যাসের রস দিতে চেয়েছেন। নফিসার মুখে বিবি খাদিজার
বিবাহপ্রস্তাব শুনে হজরত বিশ্বাস করেন নি। তখন,

বিবি খাদিজা, নফিসার মুখে সব কথা শুনে হজরতকে ডেকে পাঠালেন। হজরত
গেলে বল্লেন,—“আপনি কি নফিসার কথায় অবিশ্বাস করেছেন? মনে করেছেন,
আমার ধন আছে, আমি ধনীর ছেলেকে বিয়ে করবো? না, না, ভুল বুঝেছেন।
আমি ধন চাই নে—আপনার নির্মল মনের তুলনায় সে ধন যে ধনই নয়। যে ধন
আপনার আছে, পৃথিবীতে সকলের তা থাকে না। আপনি দুঃখিনীকে চরণে ঠাই
দিন, এই আমার প্রার্থনা। [পৃ ৭]

এর উত্তরে হজরতের মুখ দিয়ে অবশ্য উপন্যাসের নায়কের মতো উক্তি করাতে লেখক সঙ্কোচ বোধ করেছেন। তাই,

হজরত মাখা নীচু ক'রে বলেন—আচ্ছা, আমি চাচাজীকে জিজ্ঞেস ক'রে
কাল আপনাকে আমার মতামত জানাব। [পৃ ৮]

নবীনন্দিনীর জীবনকথা বলতে গিয়ে লেখক নবীর মহিমাই বেশী করে
স্মরণ করেছেন। তাঁর ভাষায় :

অসাধারণ মানুষ যঁরা, তাঁরাও ঠিক এই সূর্য্যেরই মত। তাঁদের আশেপাশে
আর আর চরিত্রও যেন সূর্য্যের পাশে লুপ্তন আলোর মতই গ্লান—দীপ্তিহীন
হ'য়ে যায়। [পৃ ৪৭]

এখানেও তাই হয়েছে। বইটিতে ফাতেমার কথা বেশী, না তাঁর জনকের কথা
কথা বেশী, তা বলা ছুড়র। ফাতেমার চরিত্রটিও হজরতের দ্বারা এমনভাবে
আচ্ছন্ন যে, তার স্বতন্ত্র বিকাশ হয় নি—হজরত-চরিত্রের একটি উপগ্রহ বলে
তাকে মনে হয়। ফাতেমার মাহাত্ম্য বর্ণনার জন্তে লেখক হজরত আয়েশা বা
বিবি খাদিজার চেয়েও তাঁকে শ্রেষ্ঠ প্রমাণ করতে ব্যস্ত ছিলেন; কোন
চরিত্রের শ্রেষ্ঠত্ব প্রমাণের এটি বোধহয় একমাত্র পন্থা নয়। সকল জীবনীকারের
মতো ইনিও সাধারণ ও ভুচ্ছ ঘটনার মধ্যে ভবিষ্যত মাহাত্ম্য লক্ষ্য করেছেন।

যে মহিলা সম্প্রদায়কে 'আনন্দ, শিক্ষা এবং তৃপ্তি'দানের জন্তে এই
গ্রন্থের অবতারণা, তাঁদের জন্তে, বিশেষ করে, ফাতেমার পতিগৃহে যাত্রার
সময়ে হজরতের বারোটি উপদেশ মূল্যবান। কৃচ্ছ্রসাধনার পরাকার্তা ফাতেমার
জীবনে আছে, তাঁর ধর্মপ্রাণতার তুলনাও বিরল।

'রাজর্ষি এবরাহীম' (১৯২৪)-কে শেখ ফজলুল করিমের শ্রেষ্ঠ রচনা বলা
যেতে পারে। তার প্রধানতম কারণ এই যে, এ বই কেবল রাজর্ষি এবরাহীমের
(মৃত্যু আঃ ৭৭৭ খৃষ্টাব্দ) কাহিনী নয় : বইয়ের দুই-তৃতীয়াংশ কি তার চেয়েও
বেশী অংশ জুড়ে রয়েছে তপস্বী আদহামের কাহিনী এবং সেই কাহিনীই
অধিকতর চিত্তাকর্ষক। আদহাম ছিলেন ঈশ্বরের প্রতি সমর্পিতপ্রাণ দরবেশ,
অপার্থিব প্রণয়ে বিভোর, নিত্যবস্তুর সন্ধানে হতজ্ঞান। আকস্মিকভাবে বলখ-

রাজনন্দিনীর অপূর্ব রূপলাবণ্য দর্শন করে তাঁর চিত্তবৈকল্য ঘটল এবং একইরকম নিষ্ঠা নিয়ে সেই রমণীকে লাভ করবার সাধনায় তিনি আত্মনিয়োগ করলেন। এই ঘটনাটির মধ্যে যে human interest আছে, তা সত্যিই মূল্যবান। আধ্যাত্মিক জীবনসাধনা থেকে পার্থিব জীবনে ফিরে আসার দৃষ্টান্ত আমাদের ‘গোরক্ষবিজয়ে’ও আছে। কিন্তু মীননাথের সেই “পতনের” পেছনে ছিল দেবীর অভিষাপ; তাঁর ভোগলালসা বিকৃতিরই নামাস্তর। আদহামের প্রেমে বরঞ্চ সুস্থ, সবল কাণ্ডজ্ঞানের পরিচয় আছে। তাঁর ভক্তজীবন ও প্রেমিক জীবনে চিরবিচ্ছেদ ঘটে নি, একই সূত্রে তিনি দুই জীবনকে গ্রথিত করেছিলেন। সুফী সাধকের ভাবতন্ময়তার সঙ্গে প্রেমিক হৃদয়ের অতলস্পর্শী গভীরতা যুক্ত হয়ে তাঁর চরিত্রটিকে বৈশিষ্ট্য দান করেছে। আর সে চরিত্র অঙ্কনেও লেখক তাঁর সকল ক্ষমতা নিয়োগ করেছিলেন।

মোজাম্মেল হকও ইবরাহীম ইবনে আদহামের সাধনকাহিনী বিবৃত করেছেন,^{২২} কিন্তু তাঁর পিতার এই পার্থিব জীবনের প্রতি কোন ইঙ্গিত করেন নি। ইবরাহীমের জীবনী বর্ণনায় উভয়ে একই ধরনের উপাখ্যান প্রায় একই ধরনের ভাষায় বিবৃত করেছেন। সুফী ঐতিহ্যের সঙ্গে এঁদের বর্ণিত কাহিনীর কোথাও কোথাও অসঙ্গতি আছে। যেমন, ফরিদউদ্দীন আত্তারের ‘তাজকিরাতুল আউলিয়া’য় ইবরাহীমের বল্ম্ব রাজ্যত্যাগের কাহিনীটি যেভাবে বলা হয়েছে, ফজলুল করিম—মোজাম্মেল হক সেভাবে বলেন নি। এঁদের কথিত কাহিনীটি সকলেই অবগত আছেন : প্রাসাদের ছাদে কে হারানো উট খুঁজতে এসেছিল এবং কে নাকি রাজপ্রাসাদকে পান্থশালা বলে অভিহিত করেছিল, এরই প্রতিক্রিয়ায় সম্রাট হলেন মহর্ষি। আত্তারের বইটিতে স্বয়ং ইবরাহীম-আদহামের জবানীতে কাহিনীটি বলা হয়েছে : একদিন তিনি সিংহাসনে বসেছিলেন, এমন সময়ে কে এনে দিল এক দর্পণ; সেদিকে তাকিয়ে নিজের গন্তব্য তিনি দেখতে পেলেন। তিনি দেখলেন নিজের সমাধি, যেখানে কোন

বন্ধু নেই—স্বজন নেই,—আর সেই পথও ছুস্তর অথচ পথচলার পাথেয় তাঁর নেই। এক গ্রায়পরায়ণ বিচারকে তিনি দেখতে পেলেন, মনে হল তাঁর স্বপক্ষে কোন দলিল নেই আর অমনি নিজের কাছেই সাম্রাজ্য হয়ে উঠল বিশ্বাদ।^{৩০}

ইবরাহীম ইবনে আদহাম যদিও প্রথম যুগের খ্যাতনামা সুফী সাধক এবং সারা জগতে আলোচনার বিষয়, তবু আদহামের বিচিত্র জীবনকাহিনীর তুলনায় তাঁর উপাখ্যান বর্ণহীন বললে ভুল হবে না—অন্ততঃ বাংলায় আমরা যেভাবে এ কাহিনী পেয়েছি, তা থেকে এই ধারণাই জন্মায়। মানুষের রিপূর যে স্বীকৃতি আদহাম-চরিত্রে রূপায়িত হয়েছে, তার প্রবল অস্বীকৃতিই ইবরাহীমের বৈশিষ্ট্য। রাজ্যত্যাগী ঋষির হৃদয়ে পুত্রস্নেহ যখন প্রবল হয়ে দেখা দিল, তখনই তিনি আল্লাহর কাছে পুত্রের জীবনাবসান কামনা করলেন আর—সেই পুত্রের জননীর উপস্থিতিতেই—তাঁর ইচ্ছা পূর্ণ হল। এ ঘটনা অলৌকিক শক্তির চরম নিদর্শন সন্দেহ নেই, এতে আমরা বিশ্বাসে আত্মতৃপ্ত হতে পারি; কিন্তু ধূলায় লুপ্ত জননীর কাতর আর্তনাদের মধ্যেই আমাদের হৃদয়ের প্রতিধ্বনি শুনতে পাই। এই উপাখ্যানে mystic element আরো আছে, তার মধ্যে একটি হল খাজা খেজেরের চরিত্র।^{৩১}

‘রাজর্ষি এবরাহীমে’ লেখক সাধুভাষা ব্যবহার করেছেন (এটি লেখা হয় ১৯১৯ এ), এমন কি, অধিকাংশ সংলাপই—ক্রিয়াপদের দিক দিয়ে—সাধু ভাষায় লেখা। সংলাপ অবশ্য মাঝে মাঝে বড় দুর্বল—বিশেষ করে, কথ্যভাষার ঢং আনার চেষ্টা যেখানে হয়েছে। যেমন, বলুখের উজীর রাজকুমারীর পাণিপ্ৰার্থী ফকীরকে ভৎসনা করেছেন :

৩০। quoted in E. G. Browne : A Literary History of Persia (Cambridge : University Press, 1951 edn.), 1, 425.

৩১। কোরআনের একটি সূরায় (সূরা ১৮ ; The Koran, trans. Rodwell, “Everyman’s Library”, p 180) এর উল্লেখ আছে বলে মনে করা হয়। তবে চরিত্রটি বিশেষ করে পারস্যের সুফীদের কল্পনাকে আকৃষ্ট করেছিল বলে তাঁদের রচনাবলীর মাধ্যমে সাধারণের চেতনায় জীবন্ত হয়ে আছে। দেশভেদে এর রূপান্তরও ঘটেছে।

যদি মঙ্গল চাও, তবে সোজা পথে প্রস্থান কর। কেন, গাছতলা বুকি আর পছন্দ
হয় না? গেরুয়ার বুকি আর সাধ মিটে না? “জামাইবাবু” সাজিবার বড় আগ্রহ
যে! [পৃ ৭১—৭২]

এ সত্ত্বেও, সামগ্রিকভাবে, ‘রাজর্ষি এবরাহীমে’র ভাষা ললিত, মধুর ও বেগবান :
সাংগীতিক ব্যঞ্জনা ও ভাবাবেগময়তা এর বৈশিষ্ট্য। যেমন,

বিধাতার লীলা চিরদিনই জুজের। অগ্নিময় বিজনমকুতে সুরসাল পান্থপাদপ
যাঁহার অসীম করুণার নিদর্শন, বন্ধুর পর্বতগাত্রে অশীতল নিবাসিণী যাঁহার
অপূর্ব মাহাত্ম্যের পরিচায়ক, তাঁহার ভাব কয়জনে হৃদয়ঙ্গম করিতে পারে?
[পৃ ৩-৪]

ফুল দেখিয়া মানুষ মোহিত হয়, আগ্রহভরে হস্ত সম্প্রসারণ করে; কেন
বলিতে পার কি? আগুন দেখিয়া ব্যাকুল পতঙ্গ কাঁপ দিতে ছুটিয়া
আসে,—মরণের মাঝেও সে সুখা অন্বেষণ করে; কেন বলিতে পার কি? ফুলে
কি চুম্বকশক্তি আছে? আগুনে কি শৈত্য আছে? কোন্ মোহে মানুষ
মজে? পতঙ্গ আত্মবিসর্জন করে? শান্ত এবং রুদ্ধ, কোমল এবং কঠোরের
অন্তরালে থাকিয়া কে এমনভাবে তাহাদের ব্যাকুল হৃদয়কে টানিয়া লয়? [পৃ ৫]

ফজলুল করিমের গদ্যরচনার সবচেয়ে পরিণত রূপ বোধহয় এ বইটিতেই ধরা
পড়েছে। তবে এ ভাষার এমন কোন বৈশিষ্ট্য নেই, যা মীর মশাররফ হোসেন,
মোজাম্মেল হক বা এয়াকুব আলী চৌধুরীর রচনায় পাওয়া যায় না।

ঘটনার গতি রুদ্ধ করে এই বইতে তিনি প্রাসঙ্গিক চিন্তা সন্নিবেশ
করেছেন—এবং একটু বেশী মাত্রায় করেছেন। এর উদাহরণ :

দাস্তিক মানুষ! অত্যাচারী মানুষ! দেখ, দেখ, মানবদেহের পরিণামের দিকে
একটাবার ফিরিয়া দেখ। তোমার জীবনের গতি ফিরিতে পারে, চরিত্রের
হীনতা দূর হইতে পারে, হৃদয়ের মলিনতা ঘুচিতে পারে,—এই তোমার
পরিণাম! ধনের মাদকতায় মনের প্রজাহারা তুমি,—এই তোমার চরম
গতি! ধনী-নিধন সকলকেই একদিন এই পথে গমন করিতে হইবে, এই
শয্যা গ্রহণ করিতে হইবে,—এইখানে আসিয়া বুভুক্ষিত কীটকুলের ভক্ষ্য

হইতে হইবে,—সেদিনের আর বিস্ময় নাই! জীবন-সঙ্গিনী প্রেমসী, প্রাণাধিক পুত্র-কন্যা, হিতার্থী বন্ধু-বান্ধব কেহই সেদিন তোমার সহযাত্রী হইবে না; একা-একা—নিতাস্তই তুমি একা পড়িয়া রহিবে। [পৃ ৮৩-৮৪]

অবশ্য এটি তাঁর নিজস্ব রীতি নয়। পাঠককে উদ্বেগ করে বা আত্মগতভাবে এই ধরণের ভাবপ্রকাশ প্রথম বোধহয় বঙ্কিমচন্দ্রের রচনাতেই দেখা দিয়েছিল। পরে, মশাররফ হোসেন এর যথেষ্ট চর্চা করে গেছেন ‘বিষাদ সিন্ধু’, ‘গাজী মিয়ার বস্তানী’ ও ‘উদাসীন পথিকের মনের কথা’য়। ব্যাপারটি যে সব সময়ে উপাদেয় হয়, তা নয় : ‘রাজর্ষি এবরাহীমে’ও সর্বত্র তা শোভন হয় নি। তবে মোটের উপর, যে ভাবুকতার পরিচয় রাখতে লেখক ইচ্ছা করেছিলেন, তাতে তিনি সফলকাম হয়েছেন।

বল্মথ-অধিপতি ও তাঁর দৌহিত্র ইবরাহীমের মিলনের দৃশ্যটিতে ‘শকুন্তলা’র ছদ্মস্তোর সঙ্গে তাঁর শিশুপুত্রের মিলনদৃশ্যের সন্ধর্ম অনুকরণ আছে।

এরপর তাঁর যে বইটি প্রকাশিত হয়েছিল, তার নাম ‘বিবি খাদিজা’ (১৯২৭) : এটি রচিত হয়েছিল ১৯২৪ সালের মধ্যেই। বর্ণিতব্য চরিত্রের পরিচয় দিতে গিয়ে তিনি বলেছেন :

খাদিজা ছিলেন এক সওদাগরের মেয়ে। সওদাগর বলতে তোমরা যা বোঝ, তা নয়। তিনি পিঠে বোচকা নিয়ে কাবুলীদের মতন গাঁয়ে গাঁয়ে ফিরি করে বেড়াতেন না,—তিনি ছিলেন ছুচার লাখ টাকার মালুয। [পৃ ১-২]

এইরকম ব্যাখ্যার একটাই কারণ হতে পারে : এ বই তিনি লিখেছিলেন মেয়েদের জন্তে আর তাঁদের কল্পনাশক্তি সম্পর্কে লেখকের ধারণা একটু সংকীর্ণই ছিল। প্রচলিত ছাঁদে লেখা এই জীবনীটিতে একটি উল্লেখযোগ্য উক্তি আছে :

বিধবাবিবাহ প্রচলিত থাকায় সমাজ ধর্ম দুইই রক্ষা পেয়েছে। নতুবা সমাজের অবস্থা আজ অন্তরকম হয়ে দাঁড়াত। [পৃ ৭৩]

এই উক্তির পেছনে সেকালের সামাজিক আন্দোলনের প্রভাব আছে। বিধবা-বিবাহ প্রচলনের জন্তে মুন্সী মেহেরুল্লাহ্ রীতিমতো প্রচার করতেন। হিন্দু

বিধবার পুনর্বিবাহের সুপারিশ করে তিনি ‘বিধবাগঞ্জনা’ নামে একটি বই লিখেছিলেন গত শতকের শেষে। ‘ইসলাম কোমুদী’তেও তিনি এ বিষয়ে আলোচনা করেছিলেন। তাঁর মৃত্যুর পর শেখ আবছুর রহিম-সম্পাদিত সাপ্তাহিক ‘মিহির ও সুধাকরে’ মন্তব্য করা হয় যে, ‘তাঁহার অসাধারণ চেষ্টায় মুসলমানদিগের মধ্যে বিধবাবিবাহের প্রচলন হইয়াছিল।’^{৩২} দেখা যাচ্ছে, ফজলুল করিম সেই ভাবে অনুপ্রাণিত হয়েছিলেন।

ফজলুল করিমের অন্যান্য প্রকাশিত গ্রন্থের মধ্যে আছে ‘গাথা’ নামে একটি কাব্য এবং ‘হাতেম তাই’য়ের গল্প-উপাখ্যান। ছোটদের জন্যে দুটি জীবনচরিত তিনি রচনা করেছিলেন: ‘সোনার বাতী’ হজরত আবছুল কাদির জিলানীর জীবনী, ‘হারুণের রশীদের গল্প’ ইতিহাসপ্রসিদ্ধ সম্রাটের কাহিনী।

তিন

শেখ ফজলুল করিমের আরো অনেক রচনা সাময়িকপত্রের পাতায় সীমাবদ্ধ হয়ে আছে, পুস্তকাকারে প্রকাশিত হয় নি। এখানে কয়েকটির পরিচয় দেওয়া যেতে পারে।

‘ইসলাম-প্রচারকে’^{৩৩} ধারাবাহিকভাবে বের হয়েছিল ‘ভগ্নবীণা বা ইসলাম চিত্র’ কাব্য। প্রথম কিস্তিতে গড়ে লেখা অবতরণিকা বের হয়: তারপর আট চরণের প্রতি স্তবকের ৫৯ স্তবকে সম্পূর্ণ কাব্যটি প্রকাশ পায়। এর বিষয় ইসলামের এককালের উন্নত অবস্থার স্মৃতি, সেই তুলনায় বর্তমান পতনের উপলব্ধি এবং পুনর্জাগরণের আহ্বান:

মভ্যতা-শিরসে যে ইসলাম বিরাজে
সে বাদশা-জাতি ফকির সাজে
অরিলেও কথা বুকে শেল বাজে
গোলামী হয়েছে জীবন সার।

৩২। শেখ হবিবুর রহমান: কস্মবীর মুনশী মেহেরুল্লা (কলিকাতা: মথুঙ্গী লাইব্রেরী, ১৯৩৫)-তে উদ্ধৃত।

৩৩। মে-জুন ১৯০২, জাম্ময়্যারী-ফেব্রুয়ারী ১৯০৩।

ক্লদ্রমজ্ঞে নেচে ছুছকার হবে
 আয় আয় তোরা চল্ যাই তবে
 ইসলাম-পতন কেমনে দেখিবে
 কেমন রে বসিয়া রয়েছ আর।

কৌতুহলের বিষয় এই যে, এর অব্যবহিত পরবর্তীকালে রচিত প্রবন্ধে তিনি এই ধরণের মনোভাবের সমালোচনা করেছেন :

“পতিত মুসলমান” নামটা আমরা অনেকদিন হইতেই পাইয়াছি। কবির কাব্যে, বক্তার গলাবাজীতে, দেখকের মসীলেপনের আড়ম্বরে এবং সমাজের সাধারণ অবস্থা পর্যালোচনা করিতে করিতে ধারণাটাও জন্মিয়া গিয়াছে। কিন্তু কথা হইতেছে,— এই “পতিত” নামটা আর কতদিন থাকিবে ?—এখন কেমন করিয়া আমাদের উন্নতির পথ প্রশস্ত হইবে— তাহাই বিচার্য।^{৩৪}

এর উত্তরে তিনি বলেছেন যে, বাঙালী মুসলমানের উন্নতির জন্তে প্রয়োজন বিদ্যাশিক্ষা, আর্থিক উন্নতি, ধর্মনিষ্ঠা এবং একতা।

‘সিপাহী যুদ্ধের বীরগাথা’ নামে বিখ্যাত বিদ্রোহী নেতা কুমার সিংহ সম্পর্কে লেখা একটি হিন্দী ছড়াও তিনি প্রকাশ করেছিলেন।^{৩৫}

কেমব্রিজ বিশ্ববিদ্যালয়ের অধ্যাপক পামার-অনুদিত ‘হারুণ অল রশীদ’ গ্রন্থের উচ্চ অনুবাদ অবলম্বন করে তিনি ‘আল হারুণ বা বোগ্দাদাধিপতি মহামান্য খলিফা হারুণ অল রশিদের বিস্তৃত জীবনচরিত’ সংকলন করেন।^{৩৬} এজন্তে অগ্ন্যান্ত ইতিহাসও তিনি দেখেছিলেন। হজরত মুহম্মদের (দঃ) জন্মের পূর্বে আরবের অন্ধকার যুগের পরিচয় দিয়ে তিনি রচনা আরম্ভ করেন। খোলাফায়ে রাশেদীনের সংক্ষিপ্ত ইতিহাস পর্যন্ত লেখাটা আমি দেখেছি। শিয়াদের মতো তিনিও এতে দাবী করেছেন যে, হজরত আলীর প্রতি বিবি আয়েশার মনোভাব অপ্রসন্ন ছিল এবং উভয়ের মধ্যে যুদ্ধ হবার কারণ এই মনোভাব থেকেই জন্মায়।

৩৪। “উন্নতির উপায় কি?”, ইসলাম-প্রচারক, মার্চ-এপ্রিল ১৯০৩।

৩৫। ইসলাম প্রচারক, জানুয়ারী ১৯০২।

৩৬। ইসলাম প্রচারক, নভেম্বর ১৯০৫—ফেব্রুয়ারী ১৯০৬। এরপর ‘ইসলাম প্রচারকে’র কোন সংখ্যা আমি দেখিনি। ফেব্রুয়ারী সংখ্যায়ও ‘আল হারুণ’ অসমাপ্ত ছিল।

‘কোহিনূর’ পত্রিকায় বেরিয়েছিল ‘উচ্ছ্বাস কাব্য’--‘মোসাদ্দাস-ই-হালী’র বঙ্গানুবাদ।^{৩৭} অনুবাদক নিবেদন করেছেন :

মোসাদ্দাসে হালী উর্দু ভাষার একখানি সর্বজনপ্রিয় শ্রেষ্ঠ কাব্য। ইহাতে আমাদের জাতীয় জীবনের উত্থান-পতন কাহিনী জঙ্গল ভাষায় বর্ণিত হইয়াছে।... এই অমূল্য কাব্যের ফলে যুক্তপ্রদেশে মরা গাঙ্গে জোয়ার ছুটিয়াছে। বঙ্গদেশের মুসলমান সমাজের বর্তমান অবস্থার প্রতি লক্ষ্য করিয়া আমরা এই কষ্টসাধ্য গ্রন্থের অনুবাদ প্রকাশে ব্রতী হইয়াছি।...

বঙ্গভাষায় “মোসাদ্দাস” ছন্দের অনুকরণ কষ্টকর, তবে করিতে পারিলে কিছু স্থায়ী লাভ হইত। আমি তাহা করিতে না পারিয়াই আপন পথে চলিয়াছি।

মধ্যে মধ্যে অনুবাদ বেশ ভাল হয়েছে। যেমন,

পশুর সমান হায়! তোমাদের নিদারুণ দশা,
অপমানে ঘৃণা নাই, সম্মানের নাহি কর আশা।
মুখর শ্রামল কুঞ্জে প্রেম-মুগ্ধ হয়ে দিবানিশি
কাটালে অমূল্য কাল, ডুবে গেল সৌভাগ্যের শশী।
নরকে নাহিক ভয়, স্বর্গমুখ কর না কামনা,
জ্ঞানধর্ম্য বিসর্জিলে, বিসর্জিলে মুক্তির সাধনা।
পবিত্র ইসলাম ধর্ম্যে ঢেলে দিলে পাপের কালিমা,
তোমাদের সে পাপের কেহ কিরে দিতে পারে সীমা?

৩৭। কোহিনূর, জ্যৈষ্ঠ ও ভাদ্র ১৩১২, পৌষ, মাঘ ও চৈত্র ১৩১৩। এখানে কাব্য সমাপ্ত হয় নি, অথচ পরবর্তী সংখ্যায় আর প্রকাশিত হয় নি। এরপর ‘কোহিনূর’র প্রথম পর্যায় বন্ধ হয়ে যায়। ১৩১৮র বৈশাখ থেকে ‘কোহিনূর’ নবপর্যায় প্রকাশিত হতে থাকে। তাতেও ‘উচ্ছ্বাস’ বের হয় নি। আবদুল মওজুদ লিখেছেন, ‘১৯১৮ খৃষ্টাব্দে শেখ ফজলুল করিম সাহিত্যবিশারদ ‘জোয়ার ভাটা’ নাম দিয়ে ‘মোসাদ্দাসের’ অনুবাদ প্রকাশ করেছিলেন’ (‘বাংলা সাহিত্যের চর্চায় মুসলমান’, সমকাল, শ্রাবণ ১৩৬৬)। এটি কি তাঁর স্বতন্ত্র অনুবাদ?

প্রথম চার চরণের অন্ত্যানুপ্রাস ছষ্ট বিবেচিত হলেও এখানে ভাষার প্রাঞ্জলতা ও রচনার গতিশীলতা দুইই দেখা যায়।

১৩১১ সালের ‘কোহিনুরে’ তাঁর রচিত “দৃশ্যকাব্য” ‘প্রেমের স্মৃতি’ সম্পূর্ণ প্রকাশিত হয়েছিল। এই নাট্য-রচনার বিষয়বস্তু নবাব সিরাজউদ্দৌলার বিষাদময় জীবনকাহিনী।

১৯০৭ সালের ‘সোলতান’ পত্রিকায় তাঁর ‘শোকগাথা’ নামক রচনাটি প্রকাশিত হয়।^{৩৮} মুন্শী মেহেরুল্লাহর মৃত্যুতে ২২৮ চরণের এই ছন্দোবদ্ধ শোকোক্কাস তিনি রচনা করেন। এর মধ্যে একটু ব্যক্তিগত তথ্য আছে, সেটাই উল্লেখযোগ্য :

হায় আজো মনে পড়ে সেদিনের কথা
যেদিন প্রথম দেখা তোমায়-আমায়,
হৃদয়ের সে প্রগাঢ় প্রীতির প্লাবন
কেমনে করিল পূর্ণ যুগল জীবন !
তোমারি বিপুল স্নেহ—আকুল আত্মানে
হতভাগ্য এই কবি লভি নববল
অবতীর্ণ হয়েছিল সাহিত্য সংসারে।

এই প্রসঙ্গে স্মরণ করা যেতে পারে যে, শেখ হবিবর রহমান-প্রণীত ‘কর্মবীর মুন্শী মেহেরুল্লাহ’র প্রারম্ভে ফজলুল করিমের লেখা তেরো পৃষ্ঠার ‘পূর্বভাস’ সংযোজিত হয়েছে। এখানেও তিনি মেহেরুল্লাহর প্রতি সকৃতজ্ঞ শ্রদ্ধা জ্ঞাপন করেছেন।

চার

এক অর্থে, শেখ ফজলুল করিমের সাহিত্যিক-মানস উনিশ শতকী সাহিত্যচর্চার আবহাওয়ায় জালিত হয়েছিল। তাঁর রচনার সর্বপ্রধান লক্ষণ হচ্ছে

৩৮। অধ্যাপক আশরাফ সিদ্দিকী এটি পুনর্মুদ্রিত করেছেন ‘মোহাম্মদী’ পত্রিকায় (শ্রাবণ ১৩৬২)।

আদর্শবাদ। আদর্শ পুরুষ ও রমণীর জীবনচিত্র অঙ্কনই ছিল তাঁর গল্পরচনার প্রথম ও প্রধান লক্ষ্য। কবিতায়ও তিনি নানা রকম নীতিবাদ প্রচার করেছেন। রচনার অবলম্বন হিসেবে তিনি কখনো ফারসী কাব্যকাহিনী আশ্রয় করেছিলেন, কখনো বা ইতিহাস ও ঐতিহ্য থেকে মালমশলা সংগ্রহ করেছেন। আদর্শ জীবনচরিত রচনার ধারা বিদ্যাসাগরের হাতেই (জীবনচরিত, ১৮৪৯) শুরু হয়েছিল, বঙ্কিমচন্দ্র এতে যোগ দিয়েছিলেন (শ্রীকৃষ্ণচরিত, ১৮৮৬); তারপর একে পরিপুষ্ট করেছিলেন ভাই গিরিশচন্দ্র সেন (১৮৩৫-১৯১০), যোগেন্দ্রনাথ বিদ্যাভূষণ প্রভৃতি এবং শেষ ছুই দশকের মুসলমান লেখকেরা। ফারসী কাব্যকাহিনীর গল্পরূপায়ণও শতাব্দীর প্রথম দিকেই আরম্ভ হয়েছিল—হরিমোহন কর্মকার, গিরিশচন্দ্র বন্দ্যোপাধ্যায় ও নীলমণি বসাক প্রভৃতির হাতে। পরে মুসলমান লেখকেরা এই ধারাটিকেও বেগবতী করেছিলেন।

কিন্তু উনিশ শতকের বাংলা সাহিত্যের ধারার সঙ্গে এই বাহ্যিক ঐক্য বড় কথা নয়। লক্ষ্য করা যাবে যে, উনিশ শতকের humanism-এর ছোঁয়া তাঁর রচনায় লাগে নি। তাই তিনি যে দেশের ও যে কালের মানুষ, তার প্রত্যক্ষ পরিচয় তাঁর রচনায় মেলা ছুঁকর। হয় সেটা এসেছে নিতান্ত আকস্মিক ভাবে, কথাপ্রসঙ্গে, কিংবা যেখানে তিনি সচেতনভাবে দেশকালের কথা বলেছেন, সেখানে। তাঁর সম্পূর্ণ রচনাবলীর তুলনায় এই অনুভূতির অভিজ্ঞান খুবই সামান্য। বরঞ্চ তাঁর লেখা থেকে এ ধারণাই জন্মায় যে, প্রাকৃত জীবনের প্রতি লেখকের ততটা আকর্ষণ বা শ্রদ্ধা ছিল না। আদর্শ জীবন বলতে তিনি ধর্মসাধনায় নিয়োজিত জীবনকেই বুঝেছেন; কাম, ক্রোধ, লোভ, মোহ, মদ, মাৎস্য—সবকিছু ত্যাগ করে যে জীবন তার স্রষ্টার ধ্যানে সমাহিত হয়েছে—এবং শুধু তাই নয়—যে জীবন অলৌকিকতার সঙ্গে সম্পৃক্ত, সেই জীবনকেই তিনি প্রণতি জানিয়েছেন। আধুনিক পাঠকের কাছে তাঁর এই জীবনবোধের আবেদন গভীর হতে পারে না।

এর ফলে, তিনি রূপকথাকে উপন্যাসের ছাঁচে ঢালার চেষ্টা করে গেলেন, অলৌকিকতাকে বাস্তবের মর্যাদা দিতে চাইলেন—কিন্তু বাস্তব মানুষের জীবনকাহিনীর কথক হতে পারলেন না। আদর্শবাদিতার আতিশয্যে তাঁর লেখাকে

অনেক সময়েই ‘বচন’ বলে মনে হয় — ‘রচনা’ বলে মনে হয় না। সংস্কৃত আলংকারিকদের একটি মূল্যবান সিদ্ধান্তের কথা মনে পড়ে। এক শ্রেণীর রচনাকে তাঁরা চিত্রকাব্য নাম দিয়েছিলেন। তাঁদের মতে, চিত্র যেমন বস্তু নয়, বস্তুর অনুকরণ, তেমনি কাব্যের অনুকরণ হচ্ছে চিত্রকাব্য : চিত্রকাব্য রচনার হেতু লেখকের অশক্তিও হতে পারে, আবার উপদেশদান ও প্রচারপ্রবৃত্তি থেকেও এর সৃষ্টি হতে পারে। ফজল করিমের শক্তি ছিল, কিন্তু নীতিগ্রন্থ-রচনার প্রতিযোগিতায় প্রবৃত্ত হয়ে সেই শক্তিকে তিনি প্রধানতঃ উপদেশদানেই ব্যবহার করেছিলেন।

এসব কারণেই, তাঁর সৃষ্টিকে আমরা মহৎ সাহিত্যের মর্যাদা দিতে পারি নে।

আমি অবশ্য ভুলি নি যে, যেকালে তিনি সাহিত্যচর্চা করেছেন, সেযুগে তাঁর রচনাবলী বাঙালী মুসলমান সমাজে সাদরে গৃহীত হয়েছিল। তার প্রধান কারণ, তখন পর্যন্ত সাহিত্য সম্পর্কে আমাদের রুচিবোধ পুরোপুরি গড়ে ওঠে নি। ঈশপের গল্পের নীতিবাক্যের মতো একটি moral সাবালকসেবা সাহিত্যেও আমরা আশা করেছি। ফজল করিম সেই প্রত্যাশা মিটিয়েছিলেন।

কিন্তু সেকাল থেকে কিছুটা দূরে বসে আজ আমাদের মনে স্বভাবতঃই প্রশ্ন জাগে, তাঁর প্রচারিত আদর্শবাদের আত্যন্তিক মূল্য কি ছিল? তাঁর জীবনবোধ কিছুটা পলায়নমুখী, লৌকিক জীবনবিরোধী। এমন কি, শরিয়তপন্থী মুসলমানের দৃষ্টিভঙ্গী থেকে দেখলেও এই সূফী ভাবধারাপুষ্ট আদর্শবাদ গ্রহণযোগ্য নয়।

উনিশ শতকে ধর্মসাধক ও তাপসদের অলৌকিক জীবনকাহিনী-রচনার ধারাটি ফজল করিমে এসে পরিণতি লাভ করেছে। ফারসী কাব্যকাহিনী অবলম্বনে গ্রন্থরচনার কালও এখানে এসে সম্পূর্ণ হয়েছে। এরপর লেখকেরা নিজেদের কাল নিয়েই সাহিত্যসৃষ্টি করেছেন। বাঙালী মুসলমান লেখকদের এই পরিবর্তিত দৃষ্টিভঙ্গির পেছনে নজরুল ইসলামের দান অসামান্য। মোজাম্মেল হক-সম্পাদিত যে ‘মোসলেম ভারতে’ ফজল করিমের ‘রাওর্ষি এবরাহীম’ প্রকাশিত হয়েছিল, সেই পত্রিকায়, সেই সময়েই, নজরুল তাঁর প্রথম জীবনের রচনা প্রকাশ করছিলেন। কিন্তু নজরুলের রচনার প্রাণশক্তিতে আকৃষ্ট হয়ে নতুন ধারায় সাহিত্যসৃষ্টি করা তখন আর একজন প্রবীণ লেখকের পক্ষে সম্ভব ছিল না। তাঁর পালা তাই তখনই সাদ্দ হল।

পরিশিষ্ট

শেখ ফজলুল করিমের গ্রন্থাবলী

১. তৃষ্ণা। করিমস লাইব্রেরী, কাকিনা, রংপুর, পৌষ, ১৩০৭। পৃ ৫+১৯।
২. মানসিংহ। কাকিনা, রংপুর, ১২০৩। পৃ ১৪+২।
৩. আসবাত উস ছার্মা বা ছার্মাতত্ব। শেখ ওয়াহিদ হোসেন, রংপুর, কার্তিক, ১৩০৭। পৃ ২৭।
৪. পরিজ্ঞাণ। মোহাম্মদ মেহেরুল্লাহ, যশোহর, ফাল্গুন, ১৩১০। পৃ ১৪৩+২।
৫. লায়লী মজনুন। ১২০৩; দ্বি-স ১২১৪, পৃ ১৫৭+১০; পরিবর্তিত ও পরিবর্তিত ষষ্ঠ-স নূর লাইব্রেরী, কলিকাতা, ১৩৩৩, পৃ ১৫৭+১৫। অষ্টম-স কলিকাতা, ১২৩১।
৬. মহষি হজরত খাজা মইনুদ্দীন চিশতি (রহঃ)। জীবন চরিত। ১২০৪; পরিবর্তিত ও পরিবর্তিত দ্বি-স, নূর লাইব্রেরী, কলিকাতা, ১২১৪। পৃ ১২৪+৮।
৭. মহষি হজরত এমাম রক্ষানী মোজাদ্দে আলফগামী (কদঃ)। জীবনচরিত। [কলিকাতা, ১২০৪]
৮. আফগানিস্থানের ইতিহাস। ১২০৯; দ্বি-স মজিদিয়া লাইব্রেরী, ঢাকা, ১২২৭। পৃ ৯৬+৬।
৯. পথ ও পাথের। ১২১৩; দ্বি-স ১২১৮; তৃ-স নবযুগ প্রকাশনী, কলিকাতা, ১২৫৪। পৃ ১৬২+৮।
১০. চিন্তার চাষ। কলিকাতা, ১২১৬।
১১. গাথা।
১২. বিবি রহিমা। কলিকাতা, ১২১৮; দ্বি-স ১২২৫; তৃ-স ১২৩৯; চ-স নূর লাইব্রেরী, কলিকাতা, ১২৫২। পৃ ১২১+৪।
১৩. হাক্কণ অল রশীদের গল্প।
১৪. সোনার বাতী।
১৫. বিবি ফাতেমা। কলিকাতা, ১২২১; দ্বি-স মখদুমী লাইব্রেরী, কলিকাতা, ১২৪০। পৃ ১৫০।
১৬. রাজষি এবরাহীম। কলিকাতা, ১২২৪; দ্বি-স মখদুমী লাইব্রেরী, কলিকাতা, ১২৪০; তৃ-স ১২৫৫, পৃ ১৬৮।
১৭. বিবি খাদিজা। মজিদিয়া লাইব্রেরী, ঢাকা, ১২২৭। পৃ ১২০+৮।
১৮. হাতেম তাই।

‘বাংলা সাহিত্যের ইতিবৃত্তে’ তাঁর আরো কয়েকটি প্রকাশিত বইয়ের নাম করা হয়েছে :

১. সরল পদ্য বিকাশ।
২. ওমর খৈয়ামের অনুবাদ (কাব্য)।
৩. বেহেশতের ফুল (গদ্য)।
৪. বাগ ও বাহার (উপন্যাস)।
৫. ভক্তি পুষ্পাঞ্জলি (কাব্য)।
৬. রাজা মহিমারঞ্জন (কাব্য ও গদ্য মিশ্রিত)।

গ্রন্থপঞ্জী

ক. শেখ ফজলুল করিম-রচিত গ্রন্থাবলী

খ. অগ্ৰাণ্ণ গ্রন্থ ও গ্রন্থতালিকা

- ১। দৈনন্দিন বিদ্যাসাগর : শকুন্তলা। দ্বিতীয় সাহিত্য পরিষৎ সংস্করণ ; কলিকাতা : বঙ্গীয় সাহিত্য পরিষৎ, ১৩৫৯।
- ২। এম. সিরাজুল হক : শিরাজী-চরিত। কলিকাতা : শিরাজী লাইব্রেরী, ১৯৩৫।
- ৩। মুহম্মদ আবদুল হাই ও সৈয়দ আলী আহসান : বাংলা সাহিত্যের ইতিবৃত্ত (আধুনিক যুগ)। ঢাকা : ঢাকা বিশ্ববিদ্যালয়, ১৯৫৬।
- ৪। (ডক্টর) মুহম্মদ এনায়েত হক : বঙ্গের স্বাধীনতা প্রভাব। কলিকাতা : মোহাম্মদ এণ্ড কোং, ১৯৩৫।
- ৫। মোজাম্মেল হক : খাজা ময়ীনউদ্দীন চিশ্তী। ঢাকা : মজিদীয়া : লাইব্রেরী, ১৩২৫।
- ৬। ———তাপস-কাহিনী। কলিকাতা : মোসলেম পাবলিশিং হাউস,।
- ৭। ———তাপস-জীবনী। কলিকাতা : লতিফ প্রেস, ১৩০৭।
- ৮। ———হজরত মোহাম্মদ। পঞ্চম সংস্করণ ; কলিকাতা : মোসলেম পাবলিশিং হাউস, ১৩৪২।
- ৯। ষোণীন্দ্রনাথ সমাদ্দার ও রাখালরাজ রায় : সাহিত্যপঞ্জিকা। কলিকাতা, ১৩২২।
- ১০। শেখ হবিবুর রহমান (সাহিত্যরত্ন) : কৰ্মবীর মুন্সী মেহেরুল্লা। কলিকাতা : মথুরা লাইব্রেরী, ১৯৩৫।
- ১১। Blumhardt, J. F. : Catalogue of the Library of the India Office, Vol. II, pt. IV : "Bengali, Oriya and Assamese Books." London, 1905.
- ১২। ———A Supplementary Catalogue of Bengali Books in the Library of the British Museum. London, 1910.
- ১৩। ———& Wilkinson, J. V. S : Second Supplementary Catalogue of Bengali Books in the Library of the British Museum. London, 1939.
- ১৪। Browne, E. G. : A Literary History of Persia, Vol 1. 5th edn. ; Cambridge : University Press, 1951.
- ১৫। Gibb, H. A. R. : Mohammedanism. 2nd edn. ; "The Home University Library" ; London : Oxford University Press, 1950.
- ১৬। Imperial Library : Author Catalogue of Printed Books in the Bengali Language, 2 Vols. Calcutta, 1941-43.
- ১৭। The Koran. translated by Rodwell, J. M. "Everyman's Library" ; London : J. M. Dent & Sons Ltd. Reprinted 1953.
- ১৮। Tarachand : Influence of Islam on Indian Culture. Allahabad : The Indian Press Ltd., 1946.

গ. সাময়িকপত্র

- ১৯। ইসলাম প্রচারক। কলিকাতা, ১৯০০-১৯০৬।
- ২০। কোহিনূর। কলিকাতা, ১৩১২-১৩১৩। ২১। নবনূর। কলিকাতা, ১৩১০-১৩১১।
- ২২। মোহাম্মদী। ঢাকা, ১৩৬২। ২৩। সমকাল। ঢাকা, ১৩৬৬।